

四庫全書

史部

欽定四庫全書

史部
湖廣通志卷四十

詳校官監察御史臣陳化龍

檢討臣德生覆勘

總校官知縣臣繆琪

校對官主事臣陳墉

謄錄監生臣王秉鈞

欽定四庫全書

湖廣通志卷四十

名宦志

居官勤恪匪以立名然實至而名歸之善政賢聲
所以歷久而不忘也愛之如父母敬之如師保甘
棠為召伯所憩峴山有叔子之碑歌春陵而懷次
山過巴東而思平仲其為千秋俎豆豈有窮哉我
皇上特簡牧民之官加意泮宮之祀誠重其事也凡百

有位倘思置一座於其間則學道愛人凜四知而
標三異允矣下民之望邦家之光矣至於左遷下
位而品行卓然者亦附見焉

總部

周召伯名奭與周同姓韓詩外傳召伯在朝有司請
營以居伯曰嗟以吾一身而勞百姓非先君文王之
志也於是出而就蒸庶於阡陌之間而聽斷焉耕桑
者倍力以勸歲大稔其後作甘棠詩以思之

然丹字子革鄭公子為楚右尹左傳昭公十二年楚子狩於州來次於乾谿與子革語求周鼎取鄭田子革誦祈招之詩以諫王不聽平王立使然丹簡上國之兵於宗丘且撫其民分貧振窮長孤幼養老疾收介特舉淹滯任良物官民大悅服

管修左傳哀公十六年白公作亂葉公在蔡方城之外皆曰可以入矣子高曰吾聞之以險徼幸者其求無饜偏重必離聞其殺齊管修也而後入杜注管修

楚賢大夫齊管仲之後聞其殺賢知其可討漢書管仲七世孫修適楚為陰大夫因氏焉

吳起史記孫吳列傳吳起衛人好用兵魏文侯以為將文侯卒武侯疑之起懼得罪遂之楚悼王素聞起賢至則相楚明法審令捐不急之官廢公族疏遠者以撫養戰鬪之士要在強兵破馳說之言從橫者於是南平百越北并陳蔡郤三晉西伐秦諸侯皆畏楚之強

漢賈誼漢書列傳洛陽人為長沙王太傅三年後歲餘文帝思誼徵之

郭賀後漢書蔡茂傳賀字喬卿洛陽人建武中拜荊州刺史有殊政百姓歌之曰厥德仁明郭喬卿中正朝廷上下平顯宗賜以三公服黼黻冕旒勅行部去襜帷令人見其容服以彰有德

謝夷吾後漢書列傳字堯卿會稽山陰人太守第五倫擢為督郵稍遷荊州刺史謝承後漢書夷吾雅性

明遠能決斷罪疑行部始到南陽縣遇孝章皇帝巡狩駕幸魯陽有詔勅荊州刺史入傳錄見囚徒誠長吏勿廢舊儀朕將覽焉上臨西廂南面夷吾處東廂分帷隔中央夷吾所決正一縣三百餘事事與上合朝廷嘆息曰諸州刺史盡如此者朕不憂天下常以勵羣臣

楊震後漢書列傳字伯起華陰人舉茂才四遷荊州刺史改東萊守當之郡道經昌邑所舉荊州茂才王

密為令夜謁見懷金十斤以遺震震曰故人知君君不知故人何也密曰暮夜無知者震曰天知地知我知子知何謂無知密愧而去

李固後漢書列傳字子堅南鄭人永和中荊州賊起彌年不定以固為刺史到郡遣使勞問境內赦其前釁與之更始賊率夏密等斂其魁黨自縛歸首固皆原之遣還使自相招集開示威法半歲間餘黨悉降州內清平

度尚後漢書列傳山陽湖陸人延熹五年長沙零陵賊合七八千人交趾蒼梧二郡皆沒豫章艾縣六百餘人焚燒長沙郡縣寇益陽荊州刺史劉度擊之軍敗桓帝詔公卿舉任代度者尚書朱穆舉尚擢荊州刺史尚躬率部曲與同勞逸廣募雜種諸蠻明設購賞進擊大破之降者數萬人桂陽宿賊渠帥卜陽潘鴻等畏尚威烈徙入山谷尚窮追數百里遂入南海破其三屯多獲珍寶而陽鴻黨衆猶盛尚欲擊之而

士卒驕富莫有鬪志乃申令軍中恣聽射獵尚乃密使所親客潛焚其營珍積皆盡獵者來還莫不涕泣尚人人慰勞深自咎責因曰卜陽等財寶足富數世諸卿但不并力耳所亡少少何足介意衆聞咸憤踊尚勅令秣馬蓐食明日徑赴賊屯大破平之

徐璆後漢書列傳字孟玉海西人遷荊州刺史時董太后姊子張忠守南陽因勢放濫賊罪數億璆當之部太后遣中常侍以忠屬璆璆曰臣身為國不敢聞

命到州舉奏忠賊餘一億又奏五郡太守及屬縣有賊汙者悉徵案罪威風大行

馮緄後漢書列傳字鴻卿巴郡宕渠人延熹五年長沙蠻寇益陽屯聚積久衆轉盛零陵蠻賊應之合二萬餘人又武陵蠻寇掠江陵間於是拜緄為車騎將軍將兵十餘萬討之緄軍至長沙賊聞悉詣營道乞降進擊武陵蠻斬首四千餘級受降十萬餘人荊州平定詔書賜錢一億固讓不受

劉表後漢書列傳字景升山陽高平人魯恭王之後
為荊州牧長沙太守張羨畔表遣兵攻破之於是開
土遂廣南接五嶺北據漢川地方數千里招誘寇賊
威懷兼洽起學校求儒術愛民養士在州二十年家
無餘積

蜀漢關羽

詳忠臣志

胡質魏志列傳字文德淮南壽春人仕魏遷荊州刺
史吳將朱然圍樊城質輕軍赴之議者謂賊盛不可

迫質曰樊城卑下兵少故當進軍為之外援不然危矣遂勒兵臨圍城中乃安其子威自京都定省家貧無車馬僮僕自驅蹇驢躬執炊爨既至十餘日告歸質賜絹一疋為威裝威曰大人清高不審於何得此絹質曰俸祿之餘以為汝糧耳威受之質帳下都督先威未發請假還家陰資裝於道要威為伴每事佐助久之詢知乃取絹謝遣之後因他信白質質杖都督一百除吏名

周瑜吳志列傳孫策以瑜為中護軍留鎮巴丘權拜
瑜偏將軍領南郡太守以下雋漢昌劉陽州陵為奉
邑瑜詣京見權乞與奮威俱進取蜀權許之瑜還江
陵為行裝而道於巴丘病卒按注孫策尚未得定江
夏瑜所鎮應在今巴丘縣所卒之巴丘應在今之巴
陵名同處異是瑜未嘗鎮今巴陵也然下雋為奉邑
則今岳州之地又地志相仍已久因存而考正之
魯肅吳志列傳字子敬臨淮東城人與周瑜定僑札

之分瑜薦肅才宜佐時孫權即見肅與語甚悅之劉
表死肅請得奉命弔表及說先主同心一意共治曹
操權即遣行聞操已向荊州晨夜兼道比至南郡而
表子琮已降曹操先主奔走欲南渡江肅徑迎之到當
陽長坂與先主會宣騰權旨及陳江東彊固勸其與權
并力先主甚歡遣諸葛亮使權肅亦反命會權與諸
將議皆勸迎操而肅獨言不可權遂任瑜以行事以
肅為贊軍校尉助畫方略曹操破走先主詣京見權

求都督荊州惟肅勸權借之操聞權以土地業先主方
作書落筆於地周瑜病上疏曰魯肅智畧足任乞以
代瑜即拜肅奮武校尉代瑜領兵瑜士衆四千餘人
奉邑四縣皆屬焉肅初住江陵後下屯陸口威恩大
行衆增萬餘人先主定益州權求長沙零桂俱不允
權遣呂蒙率衆進取先主自還公安遣關公爭三郡
肅住益陽與關公相拒肅邀相見各駐兵馬百步上
但諸將單刀俱會肅因責數關公遂割湘水為界以

零陵屬蜀長沙桂陽屬吳各罷軍歸

陸遜吳志列傳字伯言吳郡吳人以呂蒙薦拜偏將
軍右都督至陸口與關公書謙下自託公意大安乃
密陳其可擒之要權潛軍而上使與呂蒙為前部克
公安南郡領宜都太守諸城長吏及羣蠻皆降又破
房陵南鄉誘降秭歸大姓艾布等疏請荊州新遷士
人竝獲自進先主率大衆來攻從巫峽建平連營至
夷陵遜乃勅兵各持一把茅以火攻破四十餘營先

主夜去拜輔國將軍領荊州牧改封江陵侯

晉羊祜晉書列傳字叔子南城人泰始初都督荊州
諸軍事與吳人開布大信降者欲去皆聽之吳石城
守去襄陽七百餘里每為邊害祜以計令其罷守戍
邏減半分以墾田八百餘頃在軍嘗輕裘緩帶鈴閣
之下侍衛不過十數人每與吳人交兵尅日方戰不
為掩襲之計軍行吳境刈穀為糧皆計所侵送絹償
之每會衆江沔遊獵常止晉地若禽獸先為吳人所

傷而為晉兵所得者皆封還之吳人翕然悅服稱為
羊公不之名也咸寧中令王濬密修舟楫為順流之
計疏勸伐吳疾篤舉杜預自代尋卒南州人號慟罷
市吳守邊將士亦為之泣襄陽百姓於峴山建碑立
廟歲時饗祭望其碑者莫不流涕杜預因名為墮淚
碑荊州人為祜諱屋室皆以門為稱改戶曹為辭曹
云

杜預晉書列傳字元凱杜陵人羊祜卒拜預為鎮南

大將軍都督荊州諸軍事繕兵甲耀威武簡精銳襲
吳西陵督張政大破之政吳之名將也不以所喪之
實告孫皓預欲間吳邊將乃表還其所獲之衆於皓
皓果遣武昌監劉憲代政預處分既定啓請伐吳之
期太康元年陳兵江陵遣將率衆屢克城邑設伏擒
孫歆平伍延州郡皆望風歸命預仗節稱詔而綏撫
之又因兵威徙將士屯戍之家以實江北南郡故地
各樹長吏荆土肅然孫皓既平振旅凱入以功進爵

當陽縣侯還鎮講武修學置屯據要激水灌田公私
同利衆庶賴之號曰杜父舊水道唯沔漢達江陵千
數百里北無通路又巴丘湖沅湘之會表裏山川實
為險固荆蠻之所恃也預乃開楊口起夏水達巴陵
千餘里內瀉長江之險外通零桂之漕南土歌之

山簡晉書山濤傳簡字季倫懷人永嘉三年假節鎮
襄陽為賊嚴嶷所逼乃遷夏口招納流亡江漢歸附
時樂府伶人避難多奔沔漢讌會之日寮佐或勸奏

之簡曰社稷傾覆不能匡救有晉之罪人也何作樂
之有因流涕慷慨坐者咸媿焉卒贈征南大將軍儀
同三司

劉弘晉書列傳字和季沛國相人武帝太安中使持
節南蠻校尉荊州刺史討賊張昌斬之悉降其衆荆
部守宰多缺弘請補選帝從之乃叙功銓德隨才補
授甚為論者所稱勸課農桑寬刑省賦百姓愛悅流
人在荊州十餘萬戶羈旅貧乏多為盜賊弘給其田

種糧食擢用其賢才時天下大亂弘專督江漢威行
南服廣溪太守羊冉說以縱橫之事弘大怒斬之每
有興廢手書守相丁寧疑密人皆感悅曰得劉公一
紙書賢於十部從事卒於襄陽士民如喪所親

應詹晉書列傳字思遠汝南南頓人鎮南大將軍劉
弘請為長史委以軍政弘著績漢南詹之力也遷南
平太守王澄為荊州假詹督南平天門武陵三郡軍
事會谿蠻竝反討降之時政令不一諸蠻竝謀背叛

詹召蠻酋破銅券與盟由是懷詹數郡無虞百姓歌
之曰拯我塗炭惠隆丘阜潤同江海恩猶父母鎮南
將軍山簡復假詹督五郡軍事蜀賊杜疇攻詹郡力
戰摧之尋與陶侃破杜叡於長沙金寶一無所取惟
收圖書後遷益州刺史出郡時士民攀畱號泣若戀
所生

司馬承

詳長沙忠臣志

朱序晉書列傳字次倫義陽人累遷江夏相寧康初

拜使持節監沔中諸軍事南中郎將鎮襄陽符堅遣
符丕等圍序序固守賊糧將盡率衆苦攻之序母韓
自登城履行謂西北角當先受敝領百餘婢竝城中
女丁於其角斜築二十餘丈賊果攻西北潰便退守
新城丕遂引退襄人謂為夫人城

陶侃晉書列傳字士行鄱陽人劉弘為荊州刺史將
之官辟侃為南蠻長史遣先向襄陽討張昌破之陳
敏之亂以侃為江夏太守加鷹揚將軍敏遣其弟恢

寇武昌侃與諸軍并力擊恢所向必破遷龍驤將軍
武昌太守山夷多斷江劫掠侃誘斬二十人自是水
陸肅清流亡者歸之盈路侃竭資賑給焉復破杜弢
救周顥王敦表拜為持節寧遠將軍南蠻校尉荊州
刺史領西陽江夏武昌鎮沌口移入沔江遣朱伺等
討江夏賊殺之杜弢將王貢誘五谿夷以舟師斷官
運徑向武昌侃使鄭攀陶延夜趨巴陵潛師掩其不
備大破之貢遁還湘城侃令諭之截髮為信貢降弢

遂敗走進尅長沙王敦深忌其功左轉侃廣州刺史
及王敦平遷都督荆雍等州諸軍事荊州刺史楚郢
士女莫不相慶侃性明敏勤於吏治嘗語人曰大禹
聖者乃惜寸陰至於衆人當惜分陰也蘓峻作逆溫
嶠推爲盟主斬峻於陣封長沙郡公邑三千戶屬後
將軍郭默矯詔殺平南將軍劉楨侃斬默等默數與
石勒等戰賊畏其勇聞侃討之不血刃而擒益畏侃
又遣子斌等西伐樊城走石勒將郭敬使兄子臻等

破新野遂平襄陽拜大將軍上表固讓咸和七年病篤又上表遜位以後事付右司馬王愨期薨於樊谿年七十六追贈大司馬謚曰桓故吏刊石碑畫像於武昌西侃在軍四十一載雄毅善斷自南陵迄白帝數千里中路不拾遺當疾篤時將歸長沙軍資器仗牛馬舟船皆有定簿封印倉庫自加管鑰以付王愨期然後登舟朝野以為美談

桓宣晉書列傳譙國鉅人石勒將郭敬戍襄陽陶侃

使其子斌與宣攻樊城拔之敬懼遁走遂平襄陽侃
使宣鎮之宣招懷初附勸農桑減刑罰略威儀或載
鉏耒於輶軒或親耘獲於隴畝十餘年間石李龍再
遣騎攻之宣能得衆心每以寡弱拒守後庾亮為荆
州仍以宣假節鎮襄陽李龍使騎七千渡沔三面為
地窟攻城宣募精勇出其不意殺傷數百賊退走更
遣步騎收南陽諸郡百姓沒賊者八千餘人以歸久
在襄陽綏撫僑舊甚有稱績以前後功封竟陵縣男

溫嶠晉書列傳字太真太原人咸和初代應詹為江
州刺史持節都督平南將軍鎮武昌有惠政蘓峻反
京師陷嶠聞之號慟要陶侃同赴國難於是列上尚
書陳峻罪狀峻聞嶠將至逼大駕幸石頭嶠乃立行
臺布告天下凡故吏二千石臺郎御史以下皆令赴
臺至者雲集遂破賊石頭軍奮威長史滕舍抱天子
奔於嶠船朝議將留輔政嶠以王導先帝所任固辭
還藩復以京邑荒殘資用不給借資蓄具器用而後

旋及卒士庶皆相顧涕泣

毛寶

詳忠臣志

甘卓晉書列傳字季思丹陽人假節督沔北諸軍鎮襄陽為政簡惠善於綏撫估稅悉除市無二價州境所有魚池先恒責稅卓不收其利皆給貧民西土稱為惠政元帝渡江以功遷湘州刺史

樂道融

詳忠臣志

庾亮晉書列傳字元規遷鎮武昌時石勒死亮有開

復中原之謀乃授毛寶樊峻精兵一萬戍邾城又以
陶稱率部曲五千人入沔中弟翼鎮江陵武昌太守
陳翥趨子午又遣偏軍伐蜀至江陽執偽荊州刺史
李閔巴郡太守黃植送於京都亮請移鎮襄陽之石
城下并遣諸軍羅布江沔誅逋逆雪大恥帝下其議
郗鑒以資用未備不可大舉事遂寢

庾冰晉書庾亮傳冰字季堅康帝即位進車騎將軍
假節鎮武昌尋卒於官冰天性清慎常以儉約自居

中子襲嘗貸官絹十疋永怒捶之市絹還官臨卒謂
長史張彪曰吾將逝矣憾報國之志不展命也如何
死之日斂以時服無以官物也及卒無絹為衾室無
妾媵家無私積世以此稱之

庾翼晉書庾亮傳翼字稚恭成帝時除西陽太守撫
和百姓甚得歡心遷南郡太守尋假節代兄亮鎮武
昌翼以帝舅年少超居大位每竭智能勞謙匪懈戎
政嚴明經畧深遠數年中公私克實人情翕然稱其

才幹康帝即位詔加都督征討軍事師次襄陽大會僚佐陳旌甲親援弧矢曰我之行也若此射矣遂三起三疊徒衆屬目其氣十倍

謝尚晉書列傳字仁祖建元初督江夏義陽隨三郡軍事為政清簡始到官郡府以布四十疋為尚造烏布帳尚壞之以為軍士襦袴

桓豁晉書桓彝傳豁字朗子彝子為荊州刺史時梁州刺史司馬勲以梁益叛豁使參軍桓羆討之南陽

督護趙弘等逐太守桓浹據宛城以叛豁與竟陵太守羅崇討破之又討偽南中郎將趙盤於宛盤退走豁追至魯陽獲之送於京師置戍而還

桓沖晉書桓彝傳沖字幼子初除義陽太守從兄溫征伐有功遷荊州之南陽襄陽等七郡軍事鎮襄陽又從溫破姚襄賜爵豐城公尋遷振威將軍江州刺史領鎮蠻護軍西陽譙二郡太守溫之破姚襄也獲襄將張駿楊凝等徙於尋陽沖在江陵未及之職而

駿率其徒五百人殺江州督護趙毗掠武昌府庫將
妻子北叛沖遣將討獲之遽還所鎮後復領護南蠻
校尉荊州刺史持節將軍侍中如故沖既到江陵時
苻堅強盛沖上疏請移鎮上明使冠軍將軍劉波守
江陵諮議參軍楊亮守江夏堅遣其將苻融寇樊鄧
石越寇魯陽姚萇寇南鄉韋鍾寇魏興所在陷沒沖
率前將軍劉波及兄子振武將軍石民等伐苻堅拔
筑陽攻武當以疾疫還上明使石虔伐堅襄陽太守

閻震擒之及大小帥二十九人送於京都以平震功
封次子謙宜陽侯堅使其將郝貴守襄陽沖使揚威
將軍朱綽討之遂焚燒沔北田稻拔六百餘戶而還
又遣上庸太守郭寶伐堅魏興太守褚垣上庸太守
段方竝降之新城太守麴常遁走三郡皆平

魏詠之晉書列傳字長道任城人義熙中轉荊州刺
史持節都督六州領南蠻校尉雖居顯位不以富貴
驕人論者稱之尋卒於官後錄其贊議討桓玄功追

封江陵縣公

郝恢晉書郝鑒傳恢字道應金鄉人擢為雍司荆揚
等州諸軍事假節鎮襄陽甚得關隴之和降附者動
有千計姚萇遣其子略攻湖城及上洛恢遣將救之
略懼而退時慕容垂圍慕容永於潞川恢上言垂若
并永其勢難測今宜救永永垂并存自為仇讎然後
乘機雙斃則河北可平孝武帝以為然詔王恭庾楷
救之

何無忌晉書列傳東海郯人桓玄篡逆武陵王遵以
無忌為撫國將軍南追玄與劉毅等破走玄於崢嶸
洲進據巴陵玄從兄謙等乘間陷江陵無忌進軍破
走之時衛安帝還京師義熙二年遷都督江荆二州
江夏隨義陽等八郡軍事江州刺史按豫章之戰無
忌握蘓武節死之以事不關楚故不敢援入忠臣志
內後倣此

南北朝劉道規宋書臨川烈武王傳字道則彭城人

武帝少弟以義勲封華容縣公領護南蠻校尉荊州
刺史善於為治刑政明理士庶畏而愛之盧循寇逼
京邑道規遣將赴援循命荀林乘勝伐江陵桓謙復
來寇正與林會林屯江津謙軍枝江二寇交逼時有
雍州刺史魯宗之自襄陽來赴衆皆疑之道規單騎
出迎且使居守委以心腹自帥諸將大敗桓謙斬之
還至浦口林又奔散旋擊徐道覆大破之

劉粹宋書列傳字道冲沛郡蕭人為江夏相衛將軍

毅粹族兄也粹盡心高祖不與毅同高祖欲謀毅衆竝疑粹在夏口高祖愈信之及大軍至粹竭其誠力事平封灊縣男太祖即位領襄陽新野二郡太守在任簡役愛民罷諸沙門二千餘人以補府史

劉義季南史衡陽文王傳武帝第六子為荊州刺史先是義慶在任師旅應接府庫空虛義季躬行節儉蓄財省用數年間遂復充實元嘉二十一年為征北大將軍登舟之日帷幄器服諸應隨刺史者悉畱之

荆楚以為美談

劉懷肅宋書列傳彭城人義熙元年桓振襲江陵荆州刺史司馬休之出奔懷肅自雲杜馳赴日夜兼行七日而至振軍甚盛懷肅躍馬橫矛躬自突陣流矢傷其額弗卻遂斬振江陵既平加督江夏郡權鎮夏口

張邵宋書列傳字茂宗文帝時為荊州刺史以邵為司馬領南郡相衆事悉決於邵武帝受命以佐命功

封臨沮伯分荊州立湘州以邵為刺史邵以為長沙
內地非用武之國置署妨人乖為政要帝從之謝晦
反遺書要邵邵不發函馳使呈帝元嘉五年轉征虜
將軍領寧蠻校尉雍州刺史加都督邵至襄陽築長
圍修立隄堰開田數千頃郡人賴之富贍

朱修之南史列傳字恭祖平氏人南郡王義宣反約
舉兵雍土偽與之約遣使陳情於孝武孝武嘉之以
為荊州刺史加都督義宣令魯秀擊襄陽修之命斷

馬鞍山道秀不得前率衆向江陵義宣已被竺超所
執至則斬之封南昌侯修之立身清約百城貺贈一
無所受唯以蠻人宜存撫納有餉皆受得則與佐史
共之未嘗入已去鎮之日秋毫無犯

顧覲之宋書列傳字偉人吳郡吳人謝晦為荊州覲
之為晦衛軍參軍晦愛其雅素深相知待孝建二年
出為湘州刺史善於涖民治甚有績

劉懷珍南齊書列傳字道玉平原人起家本州主簿

累加至前將軍持節督同州軍事時沈攸之寓荆南
朝議疑惑懷珍曰攸之矜躁夙著虐加楚服阻兵中
流聲劫幼主不敢長驅決勝明矣乃遂遣子靈哲領
兵衛京師

蕭嶷南齊書豫章文獻王傳字宣儼太祖第二子宋
順帝時都督荆湖等八州諸軍事鎮西將軍荊州刺
史嶷至鎮一日免遣執役者三千餘人見囚五歲刑
以下皆免之以市稅重濫更定鵠格以稅還民禁諸

市調及苗籍二千石不得與人為市曹吏聽分番假
百姓甚悅建元元年太祖即位赦詔未至嶷先下令
蠲除昇明二年以前逋負後復為都督荆湘等八州
諸軍事南蠻校尉荆湘二州刺史開館立學置儒林
文學勸學等官行釋菜禮尋徵還都乃修治廨宇及
路陌東歸部曲不得齎府州物發江津士女觀送數
千人皆垂泣

柳世隆南齊書列傳字彥緒河東解人徙襄陽世祖

將下都劉懷珍白太祖曰夏口兵衝要地宜得其人
太祖納之世祖舉世隆自代轉江夏內史行郢州事
沈攸之反乘輕舸從數百人先大軍下住白螺洲以
郢城弱小不足攻遣人告世隆曰被太后令當暫還
都世隆使人答曰郢城小鎮自守而已攸之將行世
隆遣軍挑戰攸之怒令諸軍晝夜攻城世隆隨宜拒
應衆皆披卻世祖初下與世隆別曰攸之一旦為變
焚夏口舟艦沿流而東則坐守空城不可制也惟畱

攻城不可卒拔卿為其內我為其外乃無憂耳至是
世祖據西塞令堅壁以待賊疲慮世隆危亟遣心腹
胡克直潛入郢城通援軍消息內外竝喜卒平攸之
焦度南齊書列傳字文績本南安氏人父明宋元嘉
中興千餘家遷居襄陽乃立天水郡畧陽縣以居之
明帝時武陵王贊代晉熙王燮為郢州以度武勇畧
為前軍參軍時沈攸之率眾至夏口將直下京都畱
偏兵守郢而已度於城樓上肆言罵辱至發露形體

穢辱之攸之怒改計攻城甚急度親力戰攸之衆蒙
楯將登度令投以穢器賊衆不能冒至今呼此樓為
焦度樓

蕭景南史列傳字子照蘭陵人雍州刺史時魏荊州
刺史元志驅迫羣蠻蠻悉渡漢水來降議者以蠻累
為邊患可因此除之景以為窮來歸我誅之不祥乃
開樊城受降

夏侯詳南史列傳字叔業譙郡人天監三年遷湘州

刺史詳善吏事在州四載為百姓所稱州城南臨水有峻峯舊傳云刺史登此山輒代由是歷政莫敢至詳於其地起臺榭延僚屬以表損挹之志

蕭秀南史安成王傳字彥達文帝第七子安成王也天監中遷荊州刺史加都督立學校招隱逸辟處士沮水暴長敗人田秀以穀二萬斛贍之簡州中貧老單丁吏一日散遣百餘人百姓大悅荊州嘗苦旱秀責躬親祈楚望俄而雨降遂獲有年又武陵太守為

弟所殺誣以為反秀察其奸慝望風首款人謂之神
後為郢州刺史加都督郢州地居衝要賦斂殷煩至
以婦人供作秀務存約已省去游費百姓安堵夏口
常為戰地多暴骨秀於黃鶴樓下祭而埋之一夜夢
數百人拜而去每冬月常作襦袴以賜凍者遷雍州
刺史在路卒

蕭恢南史鄱陽王傳字弘達文帝第十子天監元年
除郢州刺史加都督初郢城內疾疫死者甚多不及

藏殯恢下車遽命埋瘞又遣四使巡行州郡境內大
寧時有進筒中布者恢以為奇貨異服即命焚之於
是百姓仰德後遷都督荊州刺史薨於州謚忠烈

蕭憺南史始興王傳字僧達文帝第十一子和帝時
都督荊州刺史天監元年封始興郡王時軍旅之後
公私匱乏憺勵精為政廣開屯田減省力役存問兵
死之家供其窮困四年州大旱憺使祠於天井有巨
蛇長二丈出遶祠壇俄注雨歲大豐六年州大水江

溢隄壞親率將吏冒雨築隄衆請避自言以身為百姓請命言終水退隄立又分遣諸郡遭水死者給棺槨失田者與糧種是歲嘉禾生於州界及還朝人歌曰始興王人之爹赴人急如水火何時復來乳哺我荆土方言謂父為爹故云

蕭修南史鄱陽王恢傳修字世和元帝時拜湘州刺史長沙頻遇兵荒人戶凋弊修勸穡務分未暮年流人至者一千餘家

康絢南史列傳字長明華山藍田人永元中除竟陵太守司州刺史領安陸太守在州三年大修城隍號為嚴整

王琳南史列傳字子珩會稽山陰人湘州刺史果勁絕人又能傾身下士得將卒心所得賞物不以絲毫入家平侯景之亂功為第一

張惠紹南史列傳字德繼義陽人永元六年為司州刺史領安陸太守在州和理吏民親愛之

王僧辯南史王神念傳辯字君才太原祈人梁元帝
除荊州時以僧辯代柳仲禮為竟陵太守侯景反命
督舟師赴援及至臺城陷景悉收其軍實遣還竟陵
以平湘土功復領軍將軍侯景西寇軍次夏首僧辯
為大都督軍至巴陵景既陷郢城將進寇荆門僧辯
乘城固守景軍苦攻城內矢石雨下賊乃引退命即
率巴陵諸軍討景攻拔魯山仍攻郢入羅城景乃遁
歸建業賊帥宋子仙因感求輸郢城身還僧辯偽許

掩襲大破擒之送江陵郢州平

陸子隆陳書列傳字興世吳郡吳人廢帝即位遷荊州刺史是時荊州新置治於公安城池未固子隆修建城郭綏集夷夏甚得民和當時稱為稱職

魯悉達陳書列傳字志通扶風郿人北江州刺史撫綏五郡甚得人和士卒皆樂為之用

程靈洗陳書列傳字元滌新安海寧人天嘉中都督郢州刺史華皎反遣使招靈洗斬皎使以聞朝廷嘉

之

元世遵北史陽平王熙傳孝明時遵為荊州刺史州在邊境前代以來互相抄掠世遵到州不聽侵擾其弟均時在荊州為朝陽戍主有南戍主妻以三月三日遊戲沔水側均輒遣部曲掠取世遵聞之責均遂移還本戍吳人感荷

楊大眼北史列傳武都氐難當之孫為東荊州刺史時蠻兵樊秀安等反隸都督李崇討平之大眼功尤

多妻潘氏善騎射攻戰遊獵之際戎裝與大眼齊鑣
竝轡時傳言淮泗荆沔之間有童兒啼者恐之云楊
大眼至無不即止

薛真度北史薛安都傳度河東汾陰人安都同祖弟
也西魏大統中歷荊州東荊州刺史初遷洛真度每
獻計勸先取樊鄧後攻南陽大為孝文帝所賞景明
初豫州大饑真度輒表白別出倉米五千斛為粥救
其甚者詔曰真度所表甚有憂濟百姓之意

房亮北史列傳字景高清河人大統間為東荊州刺史留心撫納遠邇安之時邊州刺史例得一子出身亮不言其子而啓弟子起為奉朝請議者稱美

韋珍北魏書韋閬傳珍字智靈高祖時遷郢州刺史有聲績朝廷嘉之賜帛穀乃召集州內貧者悉分與之尋加平南將軍荊州刺史後其子肱為荊郢和糶大使南郢州刺史田彝啓稱珍往任荊州恩洽夷夏乞肱充南道別將領荊州驍勇共為腹背詔從之未

幾行南荊州事

崔延伯北史列傳博陵人仕西魏為荊州刺史荊州土險蠻左為寇每有聚結延伯輒自討之莫不摧殄由是壤土帖然無敢為患

王則北齊書列傳字元軌太原人神武天平初以軍功都督荊州刺史有威武邊人畏服之

王思政北史列傳太原祁人都督荊州刺史境內卑濕城塹多壞思政乃命都督蘭小歡督工匠繕修之

掘得黃金三十金夜中密送至旦思政召佐史以金示之曰人臣不宜有私悉封金送上文帝嘉之又自武關以南延袤一千五百里置三十餘城竝當衝要之地凡所薦舉咸得其才子康保定二年歷安襄二州總管位柱國

宇文達北史代罽王傳字度斤突建德初出為荊州刺史有政績高祖手勅褒美之所管澧州刺史蔡澤贖貨被訟贓狀分明以其世勲不可加戮若曲法貫

之又非奉上之道乃令所司精加按劾密表奏之事
竟得釋終亦不言其處事周慎如此性好節儉食無
兼膳侍姬不過數人皆綈衣不營貲產家無儲積左
右以為言達曰君子憂道不憂貧何煩於此三年進
爵為王

王罷北史列傳字熊罷京兆霸城人太和中遷雍州
別駕清廉疾惡勵精公事後以軍功除荊州刺史梁
復遣曹義宗圍荊州堰水灌城不沒者數版城中糧

盡熊煮粥與將士均食之每出戰常不擐甲冑大呼
曰天若不祐國家使賊箭中王罷不爾王罷須破賊
屢經戰陣亦不被傷彌歷三年義宗方退

長孫儉北史列傳洛陽人孝昌中授荊州刺史東南
道行臺僕射所部鄭縣令泉璨為民所訟推治獲實
即大集僚屬謂之曰此由刺史教誨不明信不被物
是我之愆非泉璨之罪遂於廳事前肉袒自罰捨璨
不問於是屬城肅勵莫敢犯法舊俗少不敬長儉殷

勤勸導風俗大草務廣耕桑兼習武事故得邊境無虞民安其業吏民表請為構清德樓樹碑刻頌朝議許焉後以功移鎮荊州總管

柳敏北史列傳字白澤河東解人孝愍帝時出為郢州刺史甚得物情及將還朝夷夏士人感其惠政竝齋酒殽及土產候之於路敏乃從他道而還

皇甫璠北史列傳字景瑜安定天水人建德三年為隨州刺史以清白自處政存簡惠百姓安之

權景宣北史列傳字暉遠天水顯親人大統間鎮荊州與開府楊忠取梁將柳仲禮拔安陸隨郡久之隨州民吳士英等殺刺史黃道玉因聚為寇景宣以英等小賊可以計取若聲其罪恐同惡者衆乃與英書偽稱道玉凶暴歸功英等英果信之遂相率而至景宣執戮之散其黨與進拔應城於是應禮安隨竝平天和初授荊州總管十七州諸軍事荊州刺史

崔士謙北史列傳周保定二年遷總管安州刺史天

和中授江陵總管荊州刺史州既統攝遐長俗兼夷
夏又南接陳境東鄰齊寇士謙外禦強敵內撫軍人
風化大行號稱良牧每年考績常為天下最屢詔褒
美及卒於州闔境痛惜為立祠四時祭饗

申徽北史列傳字世儀魏郡人廢帝二年出為襄州
刺史時南方初附舊俗官人皆通餉遺徽性廉慎乃
畫楊震像於寢室以自戒及代還人吏送者數十里
不絕徽自以無德於民慨然懷媿因賦詩題於清水

亭長幼聞之競來就讀遞相謂曰此是申使君手迹
竝寫送之

辛慶之北史列傳字餘慶隴西狄道人從周文帝東
討為行臺左丞遷荊州刺史加儀同三司慶之位遇
雖隆而車服不尚華侈志量淹和有儒者風度特為
當時所重

隋周法尚北史列傳字德邁汝南安成人高祖受禪
拜巴州刺史破三鷗叛蠻復從王誼擊走陳寇轉黃

州總管使經畧江南及伐陳之役隸秦孝王出樊口
大破陳師轉鄂州刺史尋遷永州總管安集嶺南仍
給黃州兵三千五百人為帳內兵破降諸州前後賞
賜甚厚

薛道衡隋書列傳字元卿河東汾陰人開皇中為襄
陽總管在任清簡吏民懷其惠

王世積北史王雅傳積新閭人高祖受禪進封宜陽
郡公高顏美其才能甚善之授蘄州總管平陳之役

以舟師自蘄水趨九江有功進位柱國荊州總管後
桂州人李光仕作亂以行軍總管討平之進位上柱
國

達奚長儒北史列傳字富仁代人高祖受禪封蘄郡
公後轉荊州總管帝謂之曰江陵要害國之南門今
以委卿朕無慮也卒於官謚曰威

王誼隋書列傳字宜君其先樂浪人宣帝即位出為
襄州總管司馬消難舉兵反文帝以誼為行軍元帥

率四總管討之未至而消難奔巴蠻多叛附消難北連尉遲迥誼分兵討之旬日皆平封郢國公

乞伏慧隋書列傳字令和馬邑鮮卑人高祖時為荊州總管又領潭桂二州總三十一州諸軍事其俗輕剽慧躬行樸素以矯之風化大洽見以簞捕魚者買放之其仁心如此百姓美之號其處曰西公簞

韋世康隋書列傳京兆杜陵人從梁武帝平齊授司州總管長史於時東夏初定百姓未安世康撫綏之

士民胥悅開皇七年拜襄州刺史未幾授安州總管
後又拜荊州總管時天下惟置四大總管并揚益三
州皆親王臨統唯荊州委於世康時論以為美世康
為政簡靜百姓愛悅合境無訟十七年卒於州

裴政隋書列傳字德表河東聞喜人以平侯景功封
夷陵侯復帥師副王琳拒蕭紀破之於硤口加鎮南
府長史周師圍荊州琳自桂州來赴難次於長沙政
請從間道先報元帝至百里洲為周人所獲蕭詧命

鑠之送至城下使謂元帝曰王僧辯已自為帝王琳
孤弱不能復來政許之既而告城中曰援兵大至各
自思勉吾以間被擒當碎身報國監者擊其口終不
易辭詈怒趣行戮因蔡大業諫得釋開皇間為襄陽
總管妻子不之官所受秩俸散給僚吏民有犯罪者
陰悉知之或竟歲不發至再三犯乃因都會時於獄
中召出親案其罪台境惶懾令行禁止小民蘓息稱
為神明

唐李孝恭唐書河間王傳高祖時進荆湘道總管統
水陸十二軍伐蕭銑初發夷陵破其二鎮棄戰艦江
中諸將恐反為賊資孝恭曰使下流鎮戍見之謂銑
已破不即進援則吾拔江陵矣已而救兵至巴陵見
棄舟果疑不進銑內外阻絕遂降帝悅遷荊州大總
管置屯田立銅冶百姓利之遷襄州道行臺左僕射
時嶺表未平乃分遣使者綏輯安慰其款服者四十
有九州

李靖舊唐書列傳本名藥師雍州三原人武德四年
陳十策以圖蕭銑高祖從之授靖行軍總管兼攝趙
郡王孝恭行軍長史高祖以孝恭未更戎旅三軍之
任一以委靖其年八月集兵於夔州銑以時屬秋潦
江水泛漲三峽路險靖必不能進遂休兵不設備九
月靖乃率師而進將下峽諸將皆請停兵以待水退
靖曰兵貴神速機不可失今乘水漲之勢忽至城下
所謂迅雷不及掩耳銑必成擒也孝恭從之進至夷

陵銑將文士弘率精兵數萬屯清河孝恭欲擊之靖
曰士弘銑之健將今既失荆門盡兵來戰此救敗之
師恐不可當孝恭不從果敗賊舟大掠人皆負重靖
見其軍亂縱兵擊破之孝恭遣靖率輕兵五千為先
鋒至江陵屯營於城下孝恭以大軍繼進靖又破其
驍將楊君茂鄭文秀勒兵圍城明日銑遣使請降靖
即入據其城號令嚴肅軍無私焉時諸將咸請孝恭
籍沒銑將帥之家靖曰王師弔伐百姓既受驅逼拒

戰豈其所願且吠非其主無容等叛逆之科今新定
荆郢宜寬弘大以慰遠近之心降而籍之恐非救焚
拯溺之義於是遂止江漢之域聞之莫不爭下以功
授上柱國封永康縣公賜物二千五百段命檢校荆
州刺史

薛大鼎唐書循吏傳字重臣汾陰人高祖時為山南
道副大使開屯田以實倉廩有治名

張公謹唐書列傳字弘慎魏州繁水人襄州都督甚

有惠政卒於官年三十九太宗聞而嗟悼出次發哀有司奏言曰在辰不可哭泣太宗曰君臣之義同於父子情發於衷安避辰日遂哭之

張伯儀唐書列傳魏州人為江陵節度使樸厚不知書然推誠遇人軍中畏肅民亦便之

呂諲唐書列傳河中河東人開元末第進士上元初拜荊州長史澧朗等州節度使建請荊州置南都詔可於是更號江陵府置永平軍萬人以諲為尹又以

湖南之岳潭等七州隸其道初荊州長史張惟一以
衡州蠻酋陳希昂為司馬惟一親將年遂金與相忤
希昂率兵至惟一所捕之惟一懼斬其首以謝後希
昂入朝遷常州刺史過江陵入謁謹伏甲擊殺之竝
誅黨偶數十人積尸府門內外震服妖人申泰芝用
左道事李輔國擢諫議大夫置軍邵道二州間以泰
芝總之納羣蠻金賞以緋紫羣蠻更為剽掠吏不敢
制潭州刺史龐承鼎疾其奸因泰芝過潭縛付吏劾

賊鉅萬得左道識記竝奏之輔國矯追泰芝還京反
譖承鼎陷不辜詔譴按罪使判官嚴郢具獄暴泰芝
之惡泰芝終以賊徙死譴號令明肅賦斂均一軍士
用命境無盜賊民歌詠生祠之及歿吏哀錢十萬徙
祠府西

魯炆唐書列傳襄陽節度使時安祿山反襄陽數百
里蕩然無樵烟賊欲剽亂江湖賴炆拒其衝故南夏
以完

趙憬唐書列傳字退翁隴西人寶應中初試江夏尉累官鎮湖南時部刺史令狐峘崔敞不守法憬以正彈治之

穆寧唐書列傳懷州河內人肅宗時為鄂州刺史鄂岳沔都團練使及淮西鄂岳租庸鹽羨沿江轉運使賜金紫時淮西節度使李忠臣貪暴不奉法設防戍以稅商賈又縱兵士剽劫行人殆絕及與李夾淮為理憚寧威名寇盜輒止

李夷簡唐書宗室宰相傳字易之以宗室為山南東道節度使初貞元時江西兵五百戍襄陽制蔡右脇仰給度支死亡畧盡尚歲取其資夷簡奏罷之

李臯唐書曹王明傳臯字子蘭嗣爵曹王建中元年遷湖南觀察使前使辛京杲貪殘有將王國良鎮邵州武岡縣家豪富杲以死罪加之國良遂據縣以叛諸道同討久不能下臯遣使遺書諭之降良猶未決臯單騎徑入良壘良匍匐請罪盡降其軍貞元初拜

江陵尹荆南節度使李希烈將李思登以隨州降凡
下州四縣十七大小十餘陣未嘗敗臯於江陵廣廢
田塞古隄規江南廢洲為廬舍架江為二橋流人聚
處焉楚俗不穿井飲陂澤臯始令合錢開井以便人
汲吳少誠殺陳仙奇上以襄鄧要扼除為襄州刺史
山南東道節度使練兵積糧市回鶻馬益騎兵常大
畋以教士少誠憚之

李泌唐書列傳字長源京兆人為常哀所忌授澧朗

峽團練使有風績

裴胄唐書裴灌傳胄字應叔聞喜人擢明經樊澤徙
湘州宰相議所代德宗雅記胄才遂拜荆南節度使
是時方鎮爭剝下希恩製重錦異綾名貢奉有中使
者即悉公帑市歡胄待之有節獻餉直不數金宴勞
止三爵

崔瓘唐書列傳博陵人大厯中遷湖南觀察使時將
吏習寬弛不奉法瓘稍以禮法繩之遇害帝悼惜之

李巽唐書列傳字令叔贊皇人拜給事中出為湖南
觀察使銳於為治持下以法察無遺私吏不敢少紿
裴均唐書列傳聞喜人拜荆南節度使劉闢叛先騷
黔巫脅荆楚以固首尾均發精甲三千逆擊之賊望
風奔却加檢校吏部尚書

楊憑唐書列傳弘農人太常少卿湖南觀察使韓愈
荆潭唱和詩序僕射裴公開鎮蠻荆統郡惟九常侍
楊公領湖之南壤地二千里德刑之政並勸爵祿之

報兩宗

崔倭唐書列傳字德長祐甫從子以蘓州刺史奏課
第一遷湖南觀察使湖南舊法雖豐年貿易不出境
鄰部災荒不恤也倭至謂屬吏曰此豈人情乎無閉
糴以重困民削其禁自是商賈流通貨物益饒按倭
長安人

楊儀之韓愈送楊文使序奉詔為邑於陽山得謁湖
南之賓客於幕下及儀之之來也聞其言而見其行

智足以造謀才足以立事忠足以勤上惠足以存下
韋貫之唐書列傳名純以字行後周柱國曼八世孫
出為湖南觀察使時國用不足遣鹽鐵副使程异督
諸道賦租异諷州縣厚斂以獻貫之不忍橫賦而所
獻不中异意因取屬內六州畱錢繼之

伊慎唐書列傳字寡悔兗州人李希烈署漢南北兵
馬使不受獨率所部平江漢希烈愛其材數饋遺欲
縻止之以計免明年希烈果反曹王臯拔為大將希

烈詐為慎書行反間帝遣使即軍中斬之皐表其誣
會賊沂江徇地皐授慎兵勞而遣與賊戰大破之收
黃梅拔蔡山遂下蘄州即拜刺史天子在梁州包佶
轉糧次圻口賊遣驍將杜少誠以兵萬人遏江道不
得西慎選士列三屯分圍之慎自中出奮擊賊亂少
誠走斬別將許少華漕無畱難進圍安州希烈甥劉
戒虛來援慎逆擊於應山擒之州降以功為安州刺
史攻隨州戰厲鄉諭降李惠登拜安黃節度使

呂元膺唐書列傳字景夫鄆州東平人德宗時歷官
鄂岳觀察使嘗夜登城守者不許左右曰中丞對曰
夜不可辨乃還明日擢守者為大將

李承唐書列傳高邑人擢明經累遷山南東道節度
使時李希烈據襄州承單騎至希烈舍承外館迫脇
萬端承晏然誓以死守希烈不能屈遂大掠去襄漢
蕩然承輯綏安撫居二年闔境完復卒密謀殺希烈
尋檢校工部尚書湖南觀察使

樊澤唐書列傳字安時河中人建中初為襄州刺史
山南東道節度觀察等使澤有武藝每與諸將射獵
常出其右頻與李希烈兇黨接戰前後擒降其驍將
張嘉瑜杜文朝等收唐隨二州後為荆南節度觀察
等使會襄州節度曹王臯卒於鎮軍中剽掠擾亂以
澤威惠素著於襄漢代為襄州刺史山南東道節度
使

郗士美唐書列傳字和夫金鄉人為房州刺史黔中

經畧觀察使溪州賊大肆剽劫士美討平之後復為
鄂州觀察使

王起唐書王播傳起字舉之貞元中進士歷官襄州
刺史克山南東道節度江漢水田前政撓法塘堰缺
壞起命從事李業行屬郡檢視補繕特為水法民無
凶年

李遜唐書列傳字友道世寓荊州之石首第進士辟
襄陽掌書記元和十年拜襄州刺史山南東道節度

觀察等使襄陽前領八郡唐鄧隨在焉是時方討吳元濟朝議以唐蔡鄰接遂以鄧隸唐州三郡別為節制命高霞寓領之專俟攻討遜以五州賦餉之其襄陽軍隸於霞寓軍士家在襄州者遜厚撫之卒多捨霞寓亡歸

柳公綽唐書列傳字起之京兆華原人歷官湖南觀察使移鄂岳觀察使吳元濟叛詔公綽以鄂岳兵五千隸安州刺史李聽率赴行營公綽即請自行許之

鄂軍既在行營公綽時令左右省問其家行卒相感
戰每尅捷後為襄州刺史行部至鄧縣二吏犯法一
賊賄一舞文令以公綽必殺賊吏獄具判曰賊吏犯
法法在奸吏壞法法亡誅舞文者柳宗元武岡銘序
元和七年四月黔巫東鄙蠻獠雜擾盜弄庫兵賊脅
守帥時惟潭部戎帥御史中丞柳公綽練立將校提
卒五百屯於武岡告天子威命明白信順亂人大恐
投刃頓伏願完父子卒為忠信奉職輸賦進比華人

無敢不供母弟生壻繼來於潭咸致天庭皇帝休嘉
式新厥命兇渠同惡草面向化如醉之醒如狂之寧
公為藥石俾復其性按唐書南蠻傳元和中辰溆蠻
酋張伯靖聚衆叛黔中經畧使崔能荆南節度使嚴
綬湖南觀察使柳公綽討之三歲不能定伯靖上表
請隸荆南乃降崔能內恨之柳宗元武岡銘即指此
事而公綽本傳不載

趙宗儒唐書列傳字秉文鄧州人德宗時出為荆南

節度使散冗食成卒二千人

牛僧儒唐書列傳字思黯隋僕射竒章公弘之裔第
進士歷授武昌節度使同平章事鄂城土惡亟圮歲
增築賦蓑茅於民吏倚為擾僧儒陶甓以城五年畢
鄂人無復歲費又廢沔州以省冗員

崔郾唐書崔邠傳字廣畧博陵進士敬宗時任鄂岳
安黃等州觀察使江湖之間崔蒲是叢因造蒙衝小
艦上下十里期月而盡獲羣盜更清簡少事財用有

餘人遂寧泰

段文昌唐書段志玄傳文昌荊州人太和四年徙帥
荊南或旱禱解必雨或久雨出遊必晴事詳人物志
徐商唐書徐有功傳商字義聲有功五世孫大中時
節度山南東道襄多山棚為剽賊商取材卒為捕盜
將別為屯營寇所發輒迹捕必得遂為精兵後復官
荊南節度使

李福唐書李石傳福字能之石之弟太和中第進士

僖宗初以檢校尚書左僕射就拜畱守改山南東道
節度使王仙芝寇山南福團練鄉兵邀險須之賊不
敢入轉畧鄂以逼江陵節度使楊知溫求援於福乃
自將州兵率沙陀壯騎五百赴之賊已殘江陵郭聞
福至乃走

裴休唐書列傳字公美孟州濟源人乾符間歷荆南
節度使不為皁察行所治吏民莫不畏信

趙匡凝詳忠臣志

五代劉仁贍五代史列傳字守惠淮陰洪澤人烈祖時拜鄂州節度使元宗發楚仁贍率州師克巴陵撫納降附甚得人心

王清五代史列傳字去瑕曲周人事晉為秦國都虞侯安從進叛襄州逾年不能下清謂高行周曰從進閉孤城自守其勢豈得久耶因請先登遂攻破之周和裕五代史列傳字好問幽州人唐莊宗時為房州刺史後遷安州畱後所居皆有善政

李瓊五代史列傳字子玉幽州人世宗初為安州防禦使治郡寬簡民請立碑頌德詔中書舍人竇儀撰文賜之

劉詞五代史列傳字子謙元城人從馬全節破安州以功遷指揮使晉軍討安從進為襄州行營都虞侯後徙房州團練使歲餘為政不苛撓人頗便之

湖廣通志卷四十

欽定四庫全書

史部

湖廣通志卷四十一

詳校官監祭御史

臣陳化龍

檢討

臣

德生覆勘

總校官知縣

臣

繆琪

校對官中書

臣

宋枋遠

膳錄監生

臣

倪景寬

欽定四庫全書

湖廣通志卷四十一

名宦志

總部

宋李處耘宋史列傳上黨人建隆初朗州軍亂詔募
容延釗率師討之以處耘為都監處耘師次荆門高
繼沖遣其叔保寅軍校梁延嗣奉牛酒犒師處耘召
保寅等宴延釗之帳密遣輕騎數千倍道前進繼沖

惶怖出迎處耘即調發江陵卒萬餘人并其師晨趨朗州又先遣別將分麾下及江陵兵趨岳州大破賊於三江口獲船七百餘艘斬首四千級又遇賊帥張從富於澧江擊敗之逐北至教山砦賊棄砦走俘獲甚衆處耘釋所俘體肥者數十人令左右分啗之黥其少健者令先入朗州會暮宿砦中遲明延釗大軍繼至黥者先入城言被擒者悉為大軍所啗朗人大懼縱火焚城而潰會朗帥周保權年尚幼為大將汪

端却匿於江南岩僧寺中處耘遣麾下將田守奇帥師渡江獲之遂入潭州盡得荊湖之地

潘美宋史列傳字仲詢大名人開寶三年征嶺南以美為行營都部署朗州團練使進克富川

慕容延釗宋史列傳太原人建隆二年徙山南東道節度四年春命師南征以延釗為湖南道行營前軍都部署時延釗被病詔令肩輿即戎事賊將汪端與衆數千擾朗州延釗擒之磔於市荆湘既平加檢校

太尉

李惟清宋史列傳字直臣下邑人太平興國三年為
荆湖北路轉運判官後累陞監察御史兼總南路嘗
入奏事太宗問曰荆湖累年豐稔又無徭役民間蘇
否惟清曰臣見官賣鹽斤為錢六十四民以三數斗
稍價方可買一斤乃詔斤減十錢

王質宋史列傳字子野單父人舉進士真宗時累遷
荆湖轉運使攝江陵有訟婚者訴貧無資故後期質

捐俸助之捕盜人衣者盜叩首曰平生不為苦迫饑寒故至此質命取衣衣之人稱其治

慕容德琛宋史慕容延釗傳子德琛咸平二年轉崇儀副使荆湖北路鈐轄蠻擾澧鼎境上德琛戰於北漢奪耕牛鎧甲斬馘以歸

焦守節宋史焦繼勲傳守節字秉直長社人咸平中為江淮南荆湖路兵馬都監討施夔州叛蠻以大義諭其酋長皆悔過內附後歷知襄鄧汝三州

徐起宋史列傳字豫之鄆城人舉進士歷官荆湖北路轉運使部有戍卒殺人繫獄其徒欲刳之起聞即往按誅分其徒隸他州

徐的宋史列傳字公準建安人第進士歷官荆湖北路轉運使辰州蠻彭士義為寇的開示恩信蠻黨悔過自歸攝江陵府事城中多惡少年欲為盜夜縱火火一夜十數發的籍惡少年姓名使相保任火遂息太子洗馬歐陽景猗橫不法為里人害的發其奸竄

之嶺外後為荆湖南路安撫使討平蠻寇卒於桂陽
劉夔宋史列傳字道元崇安人以龍圖閣直學士知
潭州兼湖南安撫使初至遣人諭蠻酋使降不從乃
舉兵擊敗於銀江源進破其巢穴蠻逃遁遠去前將
以帛購蠻首至是有持首取購者按問乃輒殺平民
誅之而罷購州境獲安

齊廓宋史列傳字公闢會稽人提點荆湖南路刑獄
潭州鞠繫囚七人為強盜當論死廓訊得其狀非強

付州使劾正乃悉免死

劉沆宋史列傳字沖之永新人以龍圖閣直學士知潭州兼安撫使時湖南蠻獠數出寇至殺官吏許沆便宜從事沆大發兵至桂陽招降二千餘人使散居所部而蠻酋降者皆奏命以官又募土兵分捕餘黨破桃油平能家源斬馘甚衆

安燾宋史列傳字厚卿開封人第進士神宗時為荆湖北路轉運判官提點刑獄兼常平農田水利差役

事時方興新法奉行之吏迎合求進追胥苛切其類
旁午素平心奉法列其甚者於朝

郭逵宋史列傳字仲通洛陽人湖北溪蠻彭士義叛
逵為南路鈐轄兼知澧州盡平諸隘士義棄城走衆
悉降徙知邵州武岡蠻反討平之

馬伸宋史列傳字時中東平人紹聖四年進士金陷
汴具書張邦昌速迎康王及高宗即位擢殿中侍御
史撫諭荆湖廣南以誅張邦昌及其黨王時雍等所

過州縣輒察吏之賢否與民利疚以次列上於朝

李綱宋史列傳字伯紀邵武人紹興二年為湖廣宣撫使兼知潭州是時荆湖江湘之間流民潰卒羣積為盜多者至數萬人綱悉蕩平之上言荆地號用武之國鼎澧岳鄂荆南一帶宜屯宿重兵使四川之號令可通江漢之聲援可接乃有恢復中原之漸

李道宋史列傳字行之相州人高宗時除唐鄧郢州襄陽都統制從岳飛收復襄陽等郡累官至復州防

禦使戍鄂州武興蠻楊再興寇掠道破其衆擒再興
及其二子羣盜朱持等聚桂陽詔道移軍衡州經理
遣高仲等擊平之後戍荆南府金將劉士萼屯光化
境道掩擊焚其舟萼遂遁去再為湖北副總管卒進
封楚王

富元衡字公權姑蘇人登進士為襄陽撫司機宜都
督張俊以材薦後知興國軍歷官湖南北提刑有兵
帥李師顏餽匣金竟不啟緘謝絕之

舊通志

向子諲宋史列傳字伯恭臨江人建炎中知潭州禁
卒為亂縱火掠市出瀏陽縣遣通判孟彥卿等追及
攸縣平之金人破江西移兵湖南子諲聞警率軍民
以死守紹興初移鄂州主管荆湖東路安撫司劇盜
曹成據攸縣子諲遣使招之又遣將軍扼衡陽南守
宜章成遂巡不敢南向諸郡遂得割獲

高斯得宋史列傳字不妄知沔州稼之子淳熙中湖
廣提點刑獄薦通判潭州徐經孫等六人攸縣富民

陳衡老以家丁糧食資強賊刼殺平民斯得至有愬
其事者首吏受賕而左右之衡老造庭首吏拱立斯
得發其奸械首吏下獄羣胥失色股栗於是研鞫具
得其狀乃黥配首吏具白朝廷追毀衡老官資簿錄
其家衡老婿吳自性謀中傷斯得厚賂官者言於理
宗曰斯得以緡錢百萬進願易近地一節理宗曰高
某硬漢安得有是後加直祕閣湖南轉運判官

胡安國宋史列傳字康侯崇安人提舉湖南學事有

詔舉遺逸安國以永州布衣王繪鄧章應詔二人老
不行安國請命之官以勸為學者

柴中行宋史列傳字與之餘千人紹熙元年進士嘉
定初知襄陽兼京西帥襄州兵政久弛中行白於朝
考覈軍實舊額二萬二千人存者纔半亟招補虛籍
自是朝廷以節制之權歸帥司改湖南提點刑獄豪
家習殺人或收養亡命橫行江湖一繩以法華容令
貪虐法從交疏薦之中行笑曰是欲斷吾按章也卒

發其辜

韓世忠宋史列傳字良臣延安人建炎中以荆湖宣撫副使駐兵長沙時劉忠有衆數萬據白面山營柵相望世忠始至欲急擊宣撫使孟庾不可世忠曰兵家利害策之審矣非參政所知請期半月效捷遂與賊對壘奕棋張飲堅壁不動衆莫測一夕與蘇格聯騎穿賊營候者呵問世忠先得賊軍號隨聲應之周覽以出喜曰此天錫也夜伏精兵二千於白面山與

諸將拔營而進賊兵方迎戰所遣兵已馳入中軍奪望樓植旗蓋傳呼如雷賊回顧驚潰麾將士夾擊大破之斬忠首湖南遂平

劉珙宋史列傳字共父子羽長子也知潭州湖南安撫使郴州李金為亂珙移書制使沈介請以便宜出師曰擅興之罪吾自當之介遣田寶楊欽以兵至珙知其疲急發夫數程外代其負任犒賜過望軍士感奮下令募賊徒相捕斬詣吏者賞欽與寶連戰破賊

追至莽山賊黨執李金以降支黨竄匿者尚衆珙諭
郤兵聽其自降賊相率納兵給據歸田里第上諸將
功狀有差上賜璽書曰近世書生但務清談經綸實
才蓋未之見朕以是每有東晉之憂今卿既誅羣盜
而功狀詳實諸將優劣破賊先後歷歷可觀宜益勉
副朕意

岳飛宋史列傳字鵬舉湯陰人紹興元年權知潭州
兼權荆湖東路安撫都總管時賊曹成擁衆十餘萬

由江西歷湖湘據道賀二州詔付飛金字牌黃旗招
成成聞飛將至驚曰岳家軍來矣即分道而遁飛至
茶陵奉詔招之成不從飛奏比年多命招安故盜力
強則肆暴力屈則就招苟不略加勦除蠱起之衆未
可遽殄許之飛入賀州境得成謀者縛之帳下飛出
帳調兵食吏曰糧盡矣奈何飛陽曰姑反茶陵已而
顧謀若失意狀頓足而入陰命逸之謀歸告成成大
喜期翌日來追飛命士蓐食潛趨遠嶺未明已至太

平場破其砦成據險拒飛飛麾兵掩擊賊大潰五年
除荆湖南北制置使命招捕楊么張浚都督軍事欲
俟來年議之飛曰八日之內當俘諸酋遂如鼎州黃
佐招楊欽來降飛喜曰楊欽驍悍既降賊腹心潰矣
表授欽武義大夫禮遇甚厚乃復遣歸湖中兩日欽
說余端劉詭等降飛詭罵欽曰賊不盡降何來也杖
之復令入湖是夜掩賊營降其衆數萬么負固不服
方浮舟湖中以輪激水其行如飛旁置撞竿官舟迎

之輒碎飛伐君山木為巨筏塞諸港汊又以腐木亂草浮上流而下擇水淺處遣善罵者挑之且行且罵賊怒來追則草木壅積舟輪礙不行飛亟遣兵擊之賊奔港中為筏所拒官軍棄筏張牛革以蔽矢石舉巨木撞其舟盡壞公投水牛臯斬之飛入賊壘餘酋驚曰何神也俱降飛親行諸砦慰撫之縱老弱歸田籍少壯為軍果八日而賊平張浚嘆曰岳侯神算也呂頤浩宋史列傳字元直湖南安撫制置大使兼知

潭州時郴衡桂陽盜起頤浩遣人悉平之

薛弼宋史列傳字直老温州永嘉人登政和二年進士靖康初改湖南運判楊么據洞庭寇鼎州命岳飛討之么陸耕水戰樓船十餘丈官軍徒仰視不得近弼曰彼之所長可避而不可鬪今天旱湖水落洪連筏斷江路藁其上流使彼之長坐廢而精騎直擣其壘則破壞在目前矣飛曰善兼旬積寇盡平進直祕閣時道殣相望弼以聞帝惻然命給錢六萬緡廣西

常平米六萬斛鄂州米二十萬斛賑之民賴以甦再
知荆南桃源劇盜伍俊既招安復謀叛弼許俊以靖
州俊喜曰我得靖則地過桃源遠矣俊至則斬以徇
卒次膺宋史列傳字起季萊州人除直祕閣湖南提
刑先是湖南賊龍淵李朝擁衆數萬據茶陵次膺既
抵長沙賊勢方張即單車趨茶陵擒賊驍將戮之募賊
黨毛義龍麟等齎榜諭以朝廷務欲招安宜亟降待
以不死龍淵李朝相繼降仍請料精銳可得禁旅萬

餘次膺笑曰是皆吾民正當棄兵甲持耰鋤趣令復業奏茶陵為軍

何異宋史列傳字同叔崇仁人湖南轉運判官偶攝帥事蠻擾邵陽異募山丁捕首亂者蒲來矢以衆來降

虞允文宋史列傳字彬甫仁壽人乾道三年知樞密院事使蜀過郢奏築黃鴈山城過襄奏修府城

辛棄疾宋史列傳字幼安歷城人乾道中知潭州兼

湖南安撫盜連起湖湘棄疾悉討平之遂奏疏曰比
年李全賴文政陳子明李峒相繼竊發皆嘯聚千百
殺掠吏民至煩大兵剪滅良由州以趣辦財賦為急
吏殘民而州不問縣以竝緣科歛為急吏殘民而縣
不問民不為盜去將安之今年剗除明年剗盪譬之
木馬日刻月削不損則折望陛下申飭州縣以惠養
元元為意有違法貪冒者使諸司各揚其職無徒按
舉小吏以應故事詔獎諭之又以湖南控帶二廣與

蠻獠接連武備空虛復奏疏乞依廣東摧鋒荆南神
勁福建左翼例別勅一軍以湖南飛虎為名止撥屬
二牙密院專聽帥臣節制調度庶使蠻獠知有軍威
望風懾服詔委以規畫廼度馬殷營壘故基起蓋砦
柵招步軍二千人馬軍五百人僉人在外戰馬鐵甲
皆備先以緡錢五萬於廣西買馬五百匹詔廣西安
撫司歲帶買三千匹樞府數沮撓之棄疾行愈力卒
不能奪經度費鉅萬計棄疾善幹旋事皆立辦議者

以聚斂聞降御前金字牌俾日下住罷棄疾受而藏之出責監辦者期一月飛虎營柵成違坐軍制如期落成開陳本末繪圖繳進上遂釋然時秋霖幾月所司言造瓦不易問須瓦幾何曰二十萬棄疾曰勿憂今廂官自官舍神祠外應居民家取溝甃瓦瓦不二日皆具僚屬嘆服軍成雄鎮一方為江上諸軍之冠孟珙宋史列傳字璞玉隨州人宗政子初宗政援棗陽困敵中珙突陣脫之理宗立累功至左右統制紹

定元年創平堰於棗陽使軍民分屯是年收十五萬石六年以破金將武仙功授鄂州江陵府副都統制同元將布展共攻蔡遂滅金端平三年知黃州增埤浚隍蒐討軍實邊民歸者日衆厚加賑貸元兵掠荆湖郡守皆委去珙循環往來破砦二十四還民二萬嘉熙四年進京湖安撫制置使淳祐二年加封漢東郡公兼知江陵府登城嘆曰江陵所恃三海倘漸變為桑田敵鳴鞭而至無所限隔迺修復內隘十一別

作十隘於外又障沮漳水而東之遶城北入漢三海
遂通為一渺然巨浸土木之工百七十萬民不知役
時蜀士聚公安襄士聚郢渚珙作兩書院以沒入田
廬隸之使有所教養請帝題其榜後因有密通降款
者白於朝不從嘆曰三十年收拾中原人今志不克
伸矣遂病革卒於江陵府治訃至帝震悼贈太師封
吉國公謚忠襄廟曰威愛

江海建安人元符間襄州太尉宋史孟珙傳珙帥師

向金南門萬衆競登大戰城上門四開招布展入江海執其參政張天綱以歸

馬尊宋史陳太素傳尋須城人舉毛詩學究知汝襄等八州襄州饑人羣入富家掠困粟獄吏鞠以強盜尋曰此脫死耳其情與強盜異奏得減死論著為例李椿宋史列傳字壽翁永平人初知鄂州請行墾田復戶數千曠土大闢移湖北漕適歲大侵官強民賑糶且下其價米不至益艱食椿損所強糶數而不遏

其直未幾米舟湊集價減十三每行部必前期戒吏
具州縣所當問事列為籍單車以行所至取吏卒備
使令凡以例致饋一不受請下諸道為式召為吏部
郎遷左司復請外除直龍圖閣湖南運副請減桂陽
軍月椿錢萬二千緡損民稅折銀之直民刻石紀之
後知潭州湖南安撫使至則撫摩凋瘵氣象一如盛
時復酒稅法人以為便歲旱發廩蠲租糶常平米活
數萬人潭新置飛虎軍或以為非便椿曰長沙一都

會控扼湖嶺鎮撫蠻獠二十年間大盜三起何可無
一軍亦在馭之而已

宇文紹節宋史列傳字挺臣廣都人孝宗時以華文
閣學士湖北京西宣撫使知江陵府統制官高悅肆
為殺掠遠近苦之紹節杖殺之兵民懽悅

韓彥直宋史列傳字子溫世宗子乾道初總領湖北
京西軍馬錢糧兼發運副使尋知襄陽克京西南路
安撫使七年授鄂州駐劄御前諸軍都統制條奏軍

中六事備器械增戰馬革濫賞厲奇功選勇畧克親
隨朝廷多從之又令統制以身帥騎兵披甲徒行日
六十里使習於步戰事聞詔三衙江上諸軍倣行之
項安世宋史列傳字平父光宗時為湖廣總領會宣
撫使薛叔似罷金圍德安益急諸將無所屬安世不
俟朝命徑遣兵解圍高悅等與金力戰獲將安世第
其功以聞

劉甲宋史列傳字師文摯之後淳熙二年進士知江

陵府湖北安撫使謂荊州為吳蜀之脊高保融分三
流瀦之以為三海蓋保江陵之要害也即因遺址復
築亘四十里

朱熹宋史列傳字元晦婺源人光宗時以祕閣修撰
知潭州會洞獠擾屬郡遣人諭以禍福降之申勅令
嚴武備戢姦吏抑豪民所至興學校明教化四方學
者畢至寧宗即位趙汝愚首薦除煥章閣待制按紹
興間差監潭州南嶽廟紹熙四年除知潭州湖南安

撫時老穉聚觀夾道填擁幾不可行洞獠既平以本
路別無軍馬惟賴飛虎軍以壯聲勢而乃選隸襄陽
不便奏請隸本州節制從之更建嶽麓書院日治郡
事夜親講論坐席至不能容溢於戶外寧宗即位召
對入講尋除寶文閣待制知江陵府湖北安撫辭未
幾偽學禁起云

王政

詳忠臣志

真德秀宋史列傳字景元浦城人嘉定中湖南安撫

使知潭州以廉仁公勤四字勵僚屬以周惇頤胡安
國朱熹張栻學術源流勉其士罷榷酤除斛面米申
免和糴以甦其民民艱食既極力賑贍之復立惠民
倉五萬石使歲出糴又易穀九萬五千石分十二縣
置社倉以徧及鄉落別立慈幼倉立義阡惠政畢舉
月試諸軍射捐其回易之利及官田租凡營中病者
死未葬者孕者嫁娶者贍給有差

曾從龍宋史列傳字君錫左僕射公亮四世從孫開

禧間除湖南安撫使撫安峒獠威惠並行興學養士
湘人紀之石

張榮

詳忠臣志

曹彥約宋史列傳字簡甫都昌人湖南轉運判官時
盜羅世傳李元礪李新相繼竊發彥約至彼督運人
心始定遷知潭州湖南安撫時江西言欲招安李元
礪朝命下湖廣議招討之宜彥約言今不行討捕曲
徇招安失朝廷威重若元礪設疑詞以款重兵則不

可撤戍民不得安業元礪果不可降彥約乃督諸將
逼賊巢而屯擊破李新於鄆泚新中創死世傳素與
元礪有隙至是密請圖元礪以自效彥約錄賞格報
之且告於朝又予萬緡錢犒其師世傳遂禽元礪彥
約還長沙未幾復出督戰餘黨悉平

范天順

詳忠臣志

董槐宋史列傳字庭植定遠人嘉定進士嘉熙元年
提點湖北刑獄常德軍亂夜縱火而譟守尉不出槐

騎從數人於火所問亂故亂者曰將軍馬彥直奪吾
歲請吾屬將責之償不為亂也槐坐馬上召彥直斬
馬前亂者還入伍中明日乃捕首亂者七人戮諸市
而賻彥直之家二年兼權知常德府尋兼軍器少監
依舊提點刑獄四年進直華文閣知潭州主管湖南
安撫司公事方三邊急於守禦督府日夜徵發民且
困槐為畫策應之令民不傷而軍需亦不匱

向士璧宋史列傳字君玉常州人開慶中遷湖南安

撫使兼知潭州升湖南制置副使大元將烏梁海解
兵自交趾北還前鋒至城下攻圍急士壁極力守禦
聞後隊且至遣王輔祐率五百人往覘之以易正大
監其軍遇於南嶽市一戰有功潭州圍遂解事聞賜
金帶令服繫

趙文義

詳忠臣志

汪立信宋史列傳六安人淳祐六年第進士景定二
年克沿江制置副使節制斬黃興國軍馬尋克湖南

安撫使知潭州至官供帳之物悉置官庫所積錢連
歲代民納夏稅貧苦者予錢粟病者加藥餌雨雪旱
澇軍民皆有給興學校士習為變以潭為湖湘重鎮
創威敵軍募精銳數千人後來者果賴其用權兵部
尚書荆湖安撫制置知江陵府時襄陽被圍危急立
信上疏請益安陸府屯兵凡邊戍不宜抽減

李芾

詳忠臣志

元楊惟中元史列傳字彥誠弘州人太宗命於軍前

行中書省事克棗陽光化等軍光隨郢復等州及襄陽德安府凡得名士數十人收伊洛諸書送燕都立周惇頤祠建太極書院延趙復王粹等講授其間遂通聖賢學慨然欲以道濟天下拜中書令後世祖總統東師奏為江淮京湖南北路宣撫使俾建行臺以先啟行宣布恩信蒙古漢軍諸帥並聽節制

阿喇哈元史列傳札拉爾氏中統十一年巴延與阿珠會師襄陽阿喇哈攻郢復諸州奪郢州南門堡巴

延阿珠行視漢陽城壁欲渡江宋以精兵扼漢口阿喇哈率兵擊破沙燕堡遂入江取鄂州東略壽昌沿江州郡悉降乃撫輯其人民

阿爾哈雅元史列傳輝和爾人至元五年命與元帥阿珠劉整取襄陽圍之五年不下阿爾哈雅以為襄陽之有樊城猶齒之有脣也宜先下樊城則襄可不攻而得會西域人伊斯瑪音獻新礮法十年正月以礮攻樊破之既破樊移其攻具以向襄陽一礮中其

譙樓聲如雷震城中洶洶諸將多踰城降者劉整欲立碎其城執呂文煥以快其意阿爾哈雅獨不欲攻乃身至城下與文煥語又折矢與之誓文煥感而出降帝以阿爾哈雅行荆湖等路樞密院事鎮襄陽秦曰襄陽自昔用武之地今克之宜乘勝順流長驅宋可必平帝拜巴延為行中書省左丞相阿爾哈雅進行省右丞賞鈔二百錠十一年會師襄陽破郢州及沙洋新城師出沙蕪口宋制置夏貴守諸隘甚固阿爾

哈雅攻敗之與諸將會鄂城下阿爾哈雅集鄂民宣
上德惠禁將士毋侵掠民大悅遣人徇壽昌德安諸
郡皆下進徇江陵十有二年下岳州破沙市乃入江
陵釋繫囚放戍券軍除其徭賦及法令之繁細者傳
檄歸峽常德澧隨辰沅靖復均房施荆門及諸洞無
不降者盡奏官其所降官籍其戶口財賦來上帝喜
手詔褒之促令還鄂至鄂招潭州守臣李希不聽乃
移兵長沙拔湘陰至潭以礮攻破其木堡流矢中胸

瘡甚督戰益急大小數十戰芾力屈自殺城降諸將
欲屠之阿爾哈雅曰是州生齒數百萬口若悉殺之
非上諭已延以曹彬不殺意也其屈法生之復發倉
以食饑者

朱國寶元史列傳其先徐州人徙寶坻至元十二年
鎮常德府知安撫司事時宋諸郡邑多堅守不下國
寶傳檄招諭踰月悉平

姚燧元史列傳字端甫至元十七年除漢中道按察

副使調湖北道按部澧州興學賑民孜孜如弗及

許楫元史列傳字公度忻州人至元十三年命平章
廉希憲行中書於荆南府以楫為左右司員外郎荆
南父老輿金帛求見楫曰汝等已為大元民矣今置
吏以撫字汝輩奚用金帛求見明年擢嶺北湖南提
刑按察副使武岡富民有毆死出征軍人者陰以家
財之半誘其佃者代已款伏楫得其情釋佃者繫富
民人服其明

廉希憲元史列傳字善甫世祖時行省荆南冒暑疾
驅以進即日禁剽奪通商販興利除害兵民安堵首
錄宋故幕僚能任事者以備采訪仍擇二十餘人隨
材授職時宋故官禮謁大府必廣致珍玩希憲拒絕
且曲為諭戒之皆感激謝去及召還囊橐蕭然琴書
自隨而已江陵民號泣留之不得相與畫像建祠
賈居貞元史列傳字仲明獲鹿人至元中丞相巴延
伐宋居貞以宣撫使議行省事既渡江下鄂漢巴延

以大軍東下留右丞阿爾哈雅與居貞分鎮之居貞
曰江陵要地宜先取之驛奏聞命阿爾哈雅取江陵
居貞以僉行省事留鄂於是發倉廩以賑流亡宋宗
室子孫流寓者廩食之不變其服而行其楮幣會蘄
州寇起司空山屬縣民傳高亦起兵相應居貞移檄
諭以禍福其下遂散獲高戮之初遣鄭萬戶討賊鄭
言鄂之大姓與傳高通請先除以絕禍本貞曰高鼠
子無知行就戮矣大姓何預吾能保其無他後拜湖

北宣慰使命未下居貞閉門不出驕將悍卒合謀擾民乃復出視事人恃以無恐及去鄂之日老幼號送於道刻其像於石祠之泮宮

謝仲溫元史列傳字君玉豐縣人至元十六年為湖南宣慰使初大軍圍鄂世祖令督諸將守江軍士乏食仲溫教之鬻魚以充其食帝喜謂侍臣曰朕思不及此飲以駝乳他日不忘汝也

劉國傑元史列傳字國寶姓烏庫哩女直人徙中州

改姓劉至元二十三年朝廷以湖廣多盜拜本省左丞國傑至首平湖南盜李萬二二十五年又平湖南盜詹一仔等於衡永寶慶間斬盜首餘衆悉降或請阮之傑曰多殺不可況殺降耶乃相要地置三屯遷其衆使雜耕屯中卒為良民後永州賊李未子等寇全州進討擒斬之元貞元年即軍中加榮祿大夫湖廣行省平章政事經畫盜賊出入之所周湖廣四境皆有屯戍制度周密諸蠻不能復寇盜賊遂平

張孔孫元史列傳字夢符其先出遼之烏舍部世祖時為湖北道按察使行部巴陵有囚三百人因怒龔乙建言興銀利發其墳墓而燒其家燒死者三人有司以圖財殺人坐之孔孫原其情減罪

燕公楠元史列傳字國材建昌人世祖時遷湖廣行省右丞轉運司判官唐申家沅州豪橫奪民田武昌縣尹劉權殺主簿誣繫其妻子公楠悉正其罪

桑節元史列傳字吉甫河西人世祖時移湖廣行省

平章湖廣地連江北威順王驕縱為民病有司莫敢忤桑節謁王責之曰王帝室之懿親古所謂伯父叔父也德音不聞而騁獵宣淫非所以自貽多福王握桑節手謝之悉罷所為有胡僧曰小住持者恃寵橫甚凌轢官府桑節掩捕得妻妾女樂十八人獄具罪而籍之由是豪強斂手貧弱稱快

郭昂元史列傳字彥高彰德林州人至元間為襄陽總軍司轉沅州安撫司同知佩金符招降谿洞八十

餘柵山獠木猫土獠諸洞盡降後進安遠大將軍徇
沅州復新化安仁二縣擒劇賊張虎降其衆三千餘
人悉使歸民軍還衆歛白金以獻一無所受行至江
陵衆復致金昂悉上之行省宰臣令藏於庫以示諸
將

趙世延元史列傳字子敬成都人至元中出僉湖北
道肅政廉訪司事敦儒學立義倉撒淫祠修澧陽縣
壞堤嚴常澧掠賣良民之禁部內晏然

哈喇哈遜元史列傳烏拉納爾氏至元二十八年湖廣行省平章政事時江湖間盜賊出沒剽取商旅財貨哈喇哈遜至發卒悉擒誅之水陸之途始皆無擾初樞密置行院於各省分兵為二奸人植黨自蔽因極陳其不便帝為罷之俄有旨發湖湘富民萬家屯田廣西以圖交趾哈喇哈遜遣使奏罷民皆感悅湖南宣慰張國紀建言欲按宋末徵民間夏稅哈喇哈遜曰此乃弊政失寬大之意聖朝其可行耶奏止其

議

呼圖克特穆爾元史特默齊傳呼圖克特穆爾字漢卿
母姓劉氏人稱曰劉漢卿初授湖廣中書省理問官以軍
事入奏敷陳辨白有指趣世祖大悅曰詞簡意明
令人樂於聽受後丞相阿爾哈雅奏湖廣行省機密
事重舍漢卿無可用者從之又從皇子鎮南王征交
趾還鄂時權臣方擅威福遂退居於家達爾罕遣使
即南陽家居起用奏事京師帝嘉之擢給事中成宗

即位遷漢陽監府中順大夫

圖古勒元史列傳字親臣哈喇哈遜為湖廣平章素知其賢舉以自輔授湖廣右丞時湖南北盜賊縱橫哈喇哈遜患之圖古勒曰樹茂鳥集樹伐則散戮一人足矣盜首喬大使者居九江郡郡守伊喇瑪丹取賂蔽之遣使擒以來獄成殺而令諸市羣盜頓息

特穆爾布哈元史巴哩珠阿勒坦德濟傳泰定中特穆爾布哈分鎮襄陽俄受湖廣行省平章文帝召至

京師佐平大亂時湖廣左丞有以忌嫉害政者詔命
誅之乃為申請曰是誠有罪然不至死人服其雅量
鄂囉齊元史列傳扎拉台人以參知政事行湖北道
宣慰使時州郡初附戍以重兵民驚懼逃匿山澤間
鄂囉齊止侵暴恤單弱號令嚴明民悉復業詔括逃
俘有司拘男女千餘人無所歸議悉以隸官鄂囉齊
曰民不幸被兵幸而骨肉完聚復羈之是重被兵也
悉籍為民累拜湖廣行中書省平章政事

王都中元史列傳字元俞福寧州人荆湖北道宣慰副使適歲祲都中躬履山谷以拯其饑全活者數十萬

額森布哈元史列傳蒙古克埒氏大德初遷湖廣行省平章為政不怒而威不察而明每集議大事衆論不齊徐決一言切中事理會汴梁行省有妖獄飛語連湖廣平章劉漢傑右丞燕公楠召入二人與額森布哈嘗有違言至是急遣使附奏明其無他二人皆

得釋子額琳沁巴勒湖廣等處行中書省左丞相追封
武昌王

喇勒智喇幹元史察罕傳大德三年喇勒智喇幹以參知
政事為湖南宣慰使繼改荆湖荆湖多弊政公田為
甚威問民所不便凡十數事上於朝而言公田尤切
朝議遣使理之民力少蘇後湖廣歲織幣上供多為
奸利乃竝不遣使工不告病歲省費數萬貫

程鉅夫元史列傳初名文海大德四年遷湖北道廉

訪使至官首治行省平章家僕之為民害者上下肅然

蘇天爵元史列傳字伯修真定人以監察御史審囚於湖北地僻遠民獠雜居天爵冒瘴毒徧歷其地每判一事必留心研覈雖盛暑猶夜篝燈治文書無倦江陵民文甲無子育其甥雷乙後生兩子而出乙乙俟兩子行賣茶即舟取斧竝斫殺之沉斧水中而血漬其衣蹟故在事覺乙具服部使者乃以三年疑獄

釋之天爵曰此事二年半耳且不殺人何以衣汚血
又何以知斧在水中又其居去殺人處甚近何謂疑
獄遂復寘於理

多爾濟巴勒元史列傳字惟中平章湖廣律諸軍以法
授納粟者以官人心翕然後命供給軍食時官廩無
儲勸貸告糴民聞其事爭輸粟以助總兵者數希旨
侵辱之不為動會官軍復武昌至蘄黃巴延布哈百
計徵索無不給猶欲奏其供需失期軍帥王布哈奮

言曰平章坐不重茵食無珍味徒為我曹軍食耳今
百需立辦猶欲誣之是無人心也托克托又遣諤勒哲至
軍中使害之諤勒哲反加敬禮曰平章國之祥瑞吾苟
傷之人將不食吾餘矣軍中感疾卒於黃州蘭溪驛
達實巴圖魯元史列傳至正中別將攻襄陽進次荆
門賊十萬官軍止三千用宋廷傑計召募得義丁二
萬至蠻河兵不得渡令屈萬戶率奇兵出其後首尾
夾攻賊大敗不出乃相視形勢内外布列署李復尹

南漳黎可舉尹宜城拊循其民以賦軍饋城中民受
圍日久絕城叩營願為內應定約受號如期垂繩以
引官軍賊船在城北陰募善水者鑿其底天明城破
賊走就船船壞溺水死偽將被擒襄陽平比賊再犯
荆門安陸沔陽輒引兵敗之十三年定青山荆門諸
寨率兵略均房平穀城攻開武當山寨數十趨攻峽
州破木驢寨陞四川行省平章兼樞密院總制襄諸
軍

實喇伊都

詳忠臣志

布延特穆爾元史列傳字珍卿唐古特烏密氏至正間
徐壽輝陷湖廣詔率軍討之自池州戰勝進攻蘄州
擒鄒普泰克其城焚道士泐柵抵蘭溪口殲賊巢黃
連砦平兩巴河江路始通攻蘄水縣拔其偽都護將
相而下四百餘人壽輝僅以身免獨控長江者十六
年持身廉介人不敢干以私常乘花馬時稱為花馬
兒平章云

呂思誠元史列傳字仲實平定州人由祭酒出為湖廣行省參知政事道中授湖北廉訪使後左遷湖廣行省右丞抵武昌城下語諸將曰賊據城相持久必不知吾為此來出其不意可以入城竟不煩轉鬪而入賊倉卒驚走思誠大會軍民官吏曰賊去示吾弱也將復來於是申號令戒職事修器械葺城郭明部伍先謀自守徐議出征苗軍暴橫侵辱省憲思誠叱之曰若等能殺呂右丞乎自是無敢復至未數日召

還去二日城復陷

成遵元史列傳字誼叔穰縣人至正中調武昌總管
武昌自十二年為沔寇所殘燬大江上下皆劇盜阻
絕木值翔踴遵言於省城假軍儲鈔萬錠募勇敢具
戈船截兵境且戰且行糴粟於太平中興民多賴以
全活遵攝省事遠斥堠塞城門籍民為兵防禦備至
號令嚴肅賞罰明當賊船往來江中終不敢近岷城
賴以安

明鄧愈虹縣人初從明太祖起兵年方十六及常遇春克襄陽以愈為湖廣行省平章往鎮其地披荊棘立軍府營屯練卒拊循招徠威惠甚著洪武元年命為征戍將軍率襄漢兵定隨州均房等地五年辰澧諸蠻作亂以征南將軍討平之凡克四十八洞又捕斬黃州叛者

明史稿

胡閏字松友鄱陽人初從明師取江南攻湖廣累樹勲績歷官襄陽衛鎮撫鄧愈愈鎮襄陽閏為部將力禦

王保保開屯田省刑役遠近悅附洪武元年隨克南陽等處繼下隨州破洪山老馬劉寨討蜀河莽張四年正月上命傅友德伐蜀勅鄧愈選襄陽衛指揮任亮等率師佐之慮襄陽城守無人命閏統兵鎮守其地

舊通志

吳復字伯起合肥人以統軍元帥從徐達下漢沔荆諸郡縣授鎮武衛指揮同知守沔陽從常遇春下襄陽別將破安陸禽元同僉任亮遂守之洪武元年授

懷遠將軍安陸衛指揮使悉平鄖均庸竹諸山寨五年從鄧愈平九谿辰州諸蠻克四十八洞還守安陸後封安陸侯

明史稿

楊璟合肥人以樞密院判官從伐陳友諒有功擢湖廣行省參政鎮江陵進攻湖南蠻寇復以招討功遷行省平章政事將武昌諸衛軍攻永州擊敗元兵於東鄉俘獲千餘人遣將取寶慶定道州藍山武岡諸州縣遂克永州復移師徇郴州降其兩江土官黃英

岑伯顏等洪武四年充副將討定辰沅諸蠻寇

明史

稿

胡海字海洋定遠人從楊璟征湖南由祁陽圍永州戰東鄉生得千萬戶四人後武岡靖州諸蠻作亂悉捕誅首亂者撫其餘衆洪武九年以南征將軍討平

澧州九谿諸蠻寇

明史稿

顧成鎮遠人洪武時同都督梁福討清水江寇擒其渠魁及奸細斬首不計由是美羅餘黨皆投款建議

築楓香黃泥糾坡大田等堡保障邊民

舊通志

胡顯臨淮人隨父泉立功歷官定遼都指揮同知昭
敬皇妃泉妹也生楚王封武昌改顯武昌護衛洪武
十四年從王之國顯隨父陞辭上曰泉老矣其致仕
顯嗣官後王征銅鼓諸蠻有功陞督府僉事二十一
年從普定侯靖寧侯征東州龍海諸蠻得城邑馬畜
珍寶以獻

黃宗載字厚夫豐城人洪武三十年進士永樂初以

薦為湖廣按察僉事巨奸宿猾多謫戍銅鼓五開衛
陰持官吏短長載榜數其罪懾以重典衆莫敢犯以
上舊通志

俞士吉字用貞象山人洪武末鄉舉建文時以監察
御史出按湖廣辨釋疑獄風紀肅然

明史稿

蕭寬明一統志吉水人永樂甲申進士遷湖廣左布
政使寬宏端簡能處大事

朱與言字一諤萬安人永樂辛卯進士仕湖廣按察

僉事剛方廉慎為政務大體凡所建白皆切時弊明

史稿

俞士悅明一統志字仕朝長洲人永樂乙未進士歷遷湖廣按察副使振綱肅紀有威望居民火延及梟署僚屬奔避悅具衣冠再拜風反火滅歲大旱禱雨立應

賈諒明一統志字子信嶧縣人永樂中鄉舉累擢右副都御史巡視湖廣振憲綱存大體

薛瑄明一統志字德溫河津人永樂進士宣德間為御史監湖南銀場為政黜貪墨正風俗政事稍暇即進諸生講學不倦

朱鑑字用明晉江舉人初授蒲圻教諭宣德初擢御史按湖廣諭降梅花峒賊蕭啟寧等請命副使僉事按行所部閱民疾苦湖湘習俗男女婚嫁多踰三十鑑申明禮制旬月間嫁娶者萬餘人其俗遂革

明
史稿

熊鍊明一統志字學淵進賢人宣德庚戌進士提學湖廣性剛直不避權勢以正本敦行為先士民畏愛之

項忠字蓋臣嘉興人正統七年進士白圭既平劉通流民屯結如故通黨李源復為亂偽稱平王與王洪王彪掠南漳房諸縣詔忠總督軍務與總兵官李震討之忠至襄陽奏調永順保靖土兵分列要害遣人入山招諭流民歸者先後百餘萬竝列上善後十事

悉允行之 明史稿

王士華字彥實鄆縣進士正統間以工部都水司員外奉勅築華容諸防與布政蹇賢知縣楊銚相度便宜勸富民出粟建預備倉擇廉慎吏掌管以待工役歷九載築圩四十有八隄百五十人呼為王公隄崔恭字克讓廣宗人正統進士歷遷湖廣右布政盡革冗費公安監利流民相殺恭曰勿急急且大變下令流民願附籍者聽否且俟秋成遣歸衆遂安

以上

舊通志

應顥明一統志字文明淳安人正統乙丑進士授湖廣按察僉事御史項忠羅堯知其才檄會征靖州蠻委築沿口隄及撫荆襄新附流民勞勩最著

韓陽明一統志山陰人正統中提學湖廣公廉靜正武昌劉生有學行家貧被火為營其居助以薪米居楚數年恩義浹洽

羅堯明一統志字應韶南昌人以進士歷都御史巡

視湖廣時蠻獠竝叛麓會總兵官李震遣人諭以威德即率兵擣其巢穴大破之歲饑發賑民困賴甦何喬新字廷秀廣昌人景泰初進士累遷湖廣布政使荊州民苦徭役驗丁口貧富列為九等民甚便之

明史稿

洪弼明一統志字士直嚴州人景泰進士授湖廣按察僉事適常德辰沅饑御史白圭檄弼賑濟按戶分粟仍給牛種多所全活靖州徭叛擒其首惡餘黨悉

平賜金綺

楊琚明一統志字朝用泰和人景泰進士湖廣參議
撫治荆襄築老龍隄疏竹筒河及創築劉家隔雷家
均諸要地開創鄖陽厥功尤偉

唐瑜明一統志字廷美上海人景泰辛未進士擢湖
廣左參政分首荆襄置廩儲穀備賑撫綏均房流民
荆湖大水挽舟載米濟之水退築隄民賴其利

方中明一統志字大本淳安人天順丁丑進士授監

察御史巡按湖廣會苗獠入寇督兵討平建議遵常
法專委任省搬運設屯堡飭邊備浚河灘立巡司等
事俱允行

盧雍楚紀字廷佐江寧人天順丁丑進士累遷湖廣
左布政使凝重端厚優老植弱禮賢剔奸人不敢干
以私

沈暉字時暘宜興人天順庚辰進士累遷副都御史
撫治鄖陽操履清約立法嚴整奸豪斂跡鑿十井於

城中民甚利之

舊通志

汪進明一統志字希顏婺源人天順甲申進士擢湖廣按察僉事分巡衡永時施州土官覃景隆不法按治之躬歷其地撤去元帥舊衙毀其印牒民獲安堵戴珊明一統志字廷珍浮梁人天順甲申進士累遷都御史撫治鄖陽諸府豪右多匿流民為利珊刻日令自首嚴練兵士自製營陣法蜀盜野王剛流刼竹山平利諸縣守臣莫敢發珊請合湖陝兵誅其首惡

金史卷之八十一
卷四十一
縱脅從千餘事遂定

張悅字時敏華亭人天順進士歷湖廣按察使執法嚴峻時藩府承奉張通怙勢悅以法繩之不少貸及入覲中官尚銘督東廠衆競趨其門悅獨不往銘銜甚伺察無所得

明史稿

王恕字宗貫三原人正統間進士成化初荆襄流民相聚為亂擢恕右副都御史撫治之丁內艱起復同尚書白圭共平大盜劉通復破其黨石龍嚴束所部

流民復業

明史稿

王信字君實孝感人成化初以都指揮僉事守備荆襄賊劉千斤反信以房縣最要率十萬騎往夜張幟舉火身先士卒斬首數千級獲千斤斬之進都指揮同知後佩平蠻將軍印鎮湖廣時永順保靖二司世相讐殺信往諭之咸叩首曰累歲苦徵索將軍獨廉敢反耶武洞蠻久不戢守臣議勦信親犒以牛酒責其無狀衆稽首服罪又上疏論處苗安民諸事慎選

守令薦劉斌張全進都督同知明史稿

徐恪字公肅常熟人成化丙戌進士擢湖廣參議時萬安柄國中官汪直擅權使者旁午恪力與抗不屈後巡撫湖廣有中使攜鹽數百艘抑賣於民為恪所持阻不行其黨密構於帝居一歲改南工部侍郎去明史稿

韓文字貫通洪洞人成化丙戌進士歷湖廣右參議分巡荆南中貴督太和山稅乾沒公費文力遏之以

其羨易粟萬石備賑貸九谿土酋與鄰爭地相攻往

諭皆服後陟本省巡撫

明史稿

何淳明一統志字尚質淳安人成化丙戌進士累遷湖廣按察副使時旱澇相仍民艱於食淳區畫賑杼咸得其所山陝河南流民聚荆襄檄有司隨地施給民皆感泣轉按察使

王鑑之明一統志字明仲山陰人成化戊戌進士累官都御史撫治荆襄懲賊吏杜請託修飭學宮開堰

武陽政寬法嚴軍民賴之

林俊明一統志字待用莆田人成化戊戌進士弘治間為湖廣按察使風采稜稜所至肅然

姚文灝明一統志字秀夫貴溪人成化甲辰進士提學湖廣慨然以作人自任崇正學黜浮靡自謂所能者三毀譽不入請託不行賄賂不通嘗過洞庭舟幾危端坐風止初出都時尚書劉大夏曰僕子祖修為諸生性慵懶乞筭之灝視其文不得筭特呼筭焉後

卒於官貧不能殮僚寀治喪乃還大夏為文弔之

原傑字子英陽城人正統十年進士成化中累遷左副都御史時荆襄流民數十萬朝廷以為憂祭酒周洪謨著流民圖說謂當置府縣聽附籍為編氓帝善之十二年遂命傑出撫徧歷山谿廣宣德意流民忻然附籍得戶十一萬三千有奇其初至無產及頑梗者驅還其鄉附籍者用輕則定田賦民皆大悅乃相地勢置鄖陽府及諸縣薦知鄧州吳遠為知府各縣

皆擇鄰境良吏為之流人得所四境又安又薦御史

吳道宏撫治鄖陽鄖有撫治自此始

明史稿

邵寶字國寶無錫人成化中進士累轉湖廣布政使

端介自持政崇大體

明史稿

張敷華字公實安福人天順甲辰進士弘治初累遷

湖廣右布政使歲大饑令府縣大脩學宮以備直資

饑者藥病瘞骼增價致賈後卒李文正銘其墓有公

在藩邦藥操冰心之語

明史稿

梁璟字廷美崞縣人天順末進士累官右副都御史
巡撫湖廣弘治二年民饑請免徵兩京漕八十九萬
石從之初帝登極詔罷四方額外貢獻而提督五當
山中官復貢黃精等物中官陳喜又攜道士三千餘
人各領護持勅所至張威璟皆力請停免

明史稿

席書字文同遂寧人弘治三年進士累陞副都御史
巡撫湖廣中官李鎮張暘假進貢及御鹽名斂財十
餘萬書疏發之長沙守貪酷按坐謫戍吏民畏服

明

史稿

秦金字國聲無錫人弘治間進士巡撫湖廣諸王府
所據山場湖蕩皆奏還之官降盜賀璋羅大洪復叛
討平之郴州桂陽徭襲福全稱王金先後大破擒之
及其黨劉福興等楚亂遂平武宗親征江西楚乃接
壤李鎮朱彬肆威橫索官民塗炭金抗辭直奏請以
身當官民得免於禍

明史稿

王珪字邦器鹽山人弘治中任兵備副使治襄陽興

利除害政尚嚴明奸豪盜賊俱為斂跡

鍾雲瑞東莞人進士弘治中歷參議分守襄陽時武臣觸法轉求中官賂以金不受在任憂國惠民襄人立祠祀之

以上舊通志

王時中明一統志字道夫黃縣人弘治庚戌進士歷湖廣按察使執法嚴明操守清潔

鄭岳字汝華莆田人弘治六年進士累官湖廣僉事歸宗藩侵地於民施州夷民相仇殺按法治之荆岳

饑勸富民出粟弛河泊禁屬縣糧當輸遠衛者給以

直民乃獲濟

明史稿

周季鳳明一統志字公儀寧州人弘治癸丑進士遷
湖廣按察司左布政使在湖省最久德澤及人者深
因平郴盜有功陞都御史

林廷梈字利瞻閩縣人弘治丙辰進士歷遷湖廣左
右布政使舉治行卓異擢副都御史所至有惠政

明

史稿

孫需明一統志字孚吉德興人成化八年進士弘治末以都御史撫治鄖陽興學校復流徙廉明忠直軍民悅服正德初賜璽書金幣褒嘉之

洪鐘字宣之錢塘人成化十一年進士正德五年春湖廣歲饑盜起命總制軍務時沔陽賊楊清丘仁等僭稱天王將軍出沒洞庭間圍岳州陷臨湘官軍屢失利鐘檄布政使陳鎬及副使蔣昇都指揮潘勳破滅之鎬應天人進士既滅賊就遷巡撫檄散餘黨湖

湘底寧

明史稿

陳鳳梧字文鳴泰和人弘治丙辰進士歷湖廣提學
僉事推行聖制為十八條刊示郡縣正德六年任衡
永郴道時粵寇劫掠南贛梧檄宜章守弁提兵營於
交界以備夾攻所至詢民疾苦暇則召諸生論文督
武士教射民間頌曰詞章宋玉號令條侯

明史稿

孟祥字望之信陽人正德間任湖廣按察僉事分巡
荆南以清介著與撫軍議不合杖其掾次日即解組

去風節凜然

舊通志

王以旂字士招江寧人正德六年進士嘉靖戊戌撫
鄖時平利房竹羣盜竝起劫殺竹谿主簿勢甚猖獗
旂遣都指揮李時同知張直擒之綏賑難民給以牛
種民乃輯

胡東臯餘姚人嘉靖壬辰撫鄖時太和中官王敏
借權擾民甫下車即疏諸不法事由是中官不敢干
撫治政

章煥吳縣人嘉靖戊戌進士歷官都御史撫治鄖陽
泣襄陽首新學校以樊城古要害地建議築城躬親
督率又宜城驛馬區畫周悉民情大愜

周美字濟叔崑山人嘉靖甲辰進士累擢湖廣下江
防兵備僉事沉毅縝密不妄言笑精兵法駐蘄州當
洞庭彭蠡之交是為盜藪白晝飛艇剽劫商民捷於
箭激美立團操法作戰艘令材官日巡江上獲盜獄
成即日殪之盜由是相戒不敢入境御下嚴峻雖親

故為屬僚不少貸顏色政暇則教課諸生頗多成就
介於取與去任之日斲產枯簞蛇龜之類一無所攜
徐學謨字叔明嘉定人嘉靖間進士巡撫鄖陽等處
初歷湖廣左右兩藩其守荊州績最著景王之國以
安陸地小欲以沙市為附學謨力阻之曾修湖廣通
志

晉應槐字植吾洪洞人嘉靖間進士歷湖廣布政初
分守湖北清軍田立屯約榮府承奉死於酖理官受

賄幾脫免槐竟判坐繼陞楚臬楚府第以羣僚縱飲
被火嫁禍於樵人槐釋之抵官罪及任布政甫四月
嚴起解平衡石議文規汰宗糧節浮費臺使者皆鑄
之石

王湘字太清濟寧衛人嘉靖間進士為湖廣右布政
期年轉左時中貴人從司寇郎治張居正事湘請毋
以故相波及全楚司寇從之中貴受重賄欲復遼國
湘集吏民間便宜狀僉謂不可因據其議以復中貴

弗能奪稽覈賦法裒益盈縮撮其要領著為圖籍垂
以為式

顏鯨字應雷慈谿人嘉靖間進士督學湖廣重實學
敦先型試湖南與諸生發明心體在鄂集諸生於濂
溪書院論孔顏曾孟要旨著原性訂道諸篇

林偕春字孚元福建人嘉靖間進士為湖廣參議時
安陸苦旱田皆荒蕪偕春禱雨格以積誠歲獲大有
舒春芳鄱陽人嘉靖中任湖廣參議署荆西道每旱

率胥吏焚香告天不敢黷法枉民公餘進諸生講明性理之學務求實際訟者盈庭反覆開諭民歛歛感悟懷詞而出卒於官

姚弘謨秀水人嘉靖中由編修出守上湖南道正已率屬勤於政事尋陞督學多所甄拔秩滿擢祭酒

邵梗字良用仁和人嘉靖中分守荆西時錦衣陸炳擅權往來使車謁陵畢即拜炳祠堂梗毅然竟不一往貂黨肆虐多方調護民賴以安

以上舊通志

周思兼字叔夜華亭人嘉靖中進士累官湖廣僉事
岷府宗室五人封爵皆將軍殺人掠貨財監司避不
入武岡者二十年思兼廉得奸狀縛其黨悉繫之獄
五人藏利刃入思兼與揖而捫其臂曰吾為將軍百
口計將軍乃為此曹死耶皆退沮乃列其罪奏聞悉
錮之高牆還田宅子女於民遭內艱去

明史稿

王喬齡餘姚人嘉靖中任長寶兵巡道臨政持大體
敦尚風節時率士子講道嶽麓書院理學頗有發明

舊通志

李天植廣德州人以吏科給事中任長寶兵巡道察吏詰戎百務脩舉尤惓惓士風延修撰張元忭講學於嶽麓惜陰兩書院中一時造就者甚衆

舒應龍全州人嘉靖壬戌進士隆慶五年分守寶慶郡南百里西遊山林谷叢險為盜藪有司莫敢捕詰應龍脩舉保甲計授民兵密縛渠魁悉置之法因設永靖等堡以為弭防先是郡所屬五縣日輪一里為

供辦應龍悉為停罷民稱便焉

侯堯封字欽之嘉定人隆慶進士歷襄陽蘄州湖南
兵備道在襄築隄以禦水在蘄靖柯陳諸盜在湖南
行清文法均戴其德以上舊通志

陳允升字霽衡崑山人隆慶戊辰進士為庫部員外
時湖廣學使缺宰相張居正欲擇授賢能允升未及
格居正按部曹籍指其名曰此人可任及涖楚英流
寒雋搜錄無遺首拔士如郭正域孟養浩方逢時皆

為名臣預決逢時領解又見蕭良有文以會元目之

明史稿

汪道昆字伯玉歙縣進士萬厯初知襄陽府後晉都御史撫治鄖陽實心愛民凡百姓財力所致輒愀然曰此便是流民圖矣蠲鍰羨以賑饑正己率屬持法不阿墨吏望風解綬

舊通志

王世貞字元美太倉人嘉靖丁未進士萬厯二年撫治鄖陽糾劾貪酷咨訪將材理軍政清屯田鄖境大

治又闢清美堂購書數百種貯以課士

明史稿

管大勲鄞縣人嘉靖乙丑進士萬歷八年任衡永郴
兵巡副使視上湖南學政輯蒙引淺說存疑以啟迪
後學開南嶽水道填岳廟後龍脈以培地氣遷廣西
參政去士民懷之

舊通志

余學曾錢塘人萬歷間提學湖廣閱試卷竝其人邪
正休咎異日名位皆於尺幅中暗識之藻鑒獨稱不
爽

熊宇奇新建人萬厯間提學湖廣衡鑒公明所拔多名士丁酉科試江夏置賀逢聖第一熊廷弼第二秋聞揭曉前一夕藩臬諸司飲外簾詢省元當何在曰在江夏非熊即賀及發榜果熊也諸司嘆服嘗評二人曰賀清廟瑚璉熊干將鏌鋁後熊聯捷入臺端赫奕有聲而賀僅司鐸應城奇復來參藩政丙辰春賀中鼎甲捷音至乃撫掌大喜曰鑑不爽矣鄂人傳為佳話

李同芳字晴原崑山人萬厯間進士以禮部員外郎
主湖廣鄉試壬辰歷湖廣參政廉敏有聲曾孫可汧
湖廣提學道

鄧雲霄字虛舟東莞人萬厯戊辰進士由戶科給事
中轉衡永郴兵備建大觀樓於石鼓書院重修南岳
志疏通錢法雲霄雅負文望而尤刻意吏治凡弊政
病民者力為剔除境內肅然

以上舊通志

馮應京字可大盱眙人萬厯庚子由進士任武昌兵

巡道時稅監陳奉肆害鄉民京抗疏列其九大罪竟為所中被逮去士民立祠大別山前歲時致祭

明史

稿

董其昌字玄宰華亭人萬厯辛丑會魁由翰林出為湖廣副使移疾歸起故官督楚學政衡文一目數行下每行部試士不數日而竣因不徇請託為勢家所怨嗾生儒數百人鼓譟毀其署即拜疏求去詔不許兼令所司按治其昌卒致政歸

明史稿

劉東星字子明沁水人隆慶二年進士萬厯間為湖

廣布政講學以節義風諸生

舊通志

葛寅亮字此瞻錢塘人萬厯辛丑進士督楚學政杜絕請謁衡文有精鑒士經品題其科第先後功名事業皆一一不爽

陳于王字伯襄嘉善人萬厯間進士為湖廣參政備兵武昌歲大祲發數千金賑之全活者衆所部多盜柯陳十三姓尤桀驁阻險不可迹于王蒐練材官嚴

賞罰責以盡力盜發輒得後皆令其自新盜患悉平
竇子偁號淮南合肥人萬厯中提學湖廣置學田修
王惠橋既陞任去士民歌思立祠金沙洲

馬鳴鑾內江人進士歷分守上湖南道為政敦大明
敏時宗藩縱恣為民害鳴鑾一繩以法民賴以安

高第字縈塘灤州人萬厯中以進士分守荆西修學
宮及魁星樓尊經閣捐貲區畫不煩民力

郭子章號青螺秦和人萬厯間為湖廣右布政廉潔

愛士尋陞任去

杜詩字友白濟南人萬厯中以進士任湖廣左布政
至誠惻怛愛人好士居官手不釋卷博洽淹雅刻離
騷文選及海忠介疏等書俾士類務古人實學成就
者衆

劉觀光號蘿徑南海人萬厯末分守武昌署提學道
憐才愛士諸生如彭光祀劉映震等皆被其賞拔
梁有年號星田廣東順德人萬厯末由刑科出為河

南按察使尋補湖廣嘉意造士開黃鶴社課文藝陞
江西副使人多思之

以上舊通志

王志堅字弱生崑山人萬厯中進士初為湖北清軍
驛傳道按驛額復軍伍績甚著旋督楚學廣科歲二
試士無遺材禮部推為學政第一

明史稿

周燝號聚九莆田人萬厯末提學湖廣繼葛寅亮之
後品藻精朗所刻有方泳錄南華二編

舊通志

韓光曙蘇州人由進士分守上湖南道性寬和常誠

屬吏母事苛刻尤加意學校捐俸修葺學宮在任三年人咸懷之

馮時可華亭進士以湖北道副使轉上湖南道所至率先吏治涖永州甫下車即搜覈利弊勤為興革宿習為之一清

瞿汝說號星卿常熟景淳子萬厯中進士督學湖廣以剛正聞

韓孫受字君溥慈谿進士累遷湖廣江防參議執法

嚴明課士興學修砌江岸浮玉磯斬人肖像祀之

馬人龍號荊陽太湖人萬厯末提學湖廣衡文持正
不尚纖巧楚士如劉民悅李應選吳裕中皆其所拔
前矛

王景四川華陽進士任江防道教民化俗興賢獎能
以和平致理

以上舊通志

蔡復一字敬夫同安人萬厯進士始遷湖廣參政陞
右布政使清介自持天啟間撫鄖時亢旱三月不雨

步禱自狀其罪又不雨乃令開圉園素冠布袍坐其中是夕甘雨如注

明史稿

李叔元字端和晉江人天啟初任湖廣左布政時魏璫柄權天下奔趨如狂元與諸生講學每至君子小人宦官宮妾之際侃侃言之

舊通志

葉秉敬字寅陽浙江西安人天啟初以進士分守荆西才識宏遠博雅好文公餘手不釋卷與諸生講學寒暑不輟

周士昌四川人萬厯庚戌進士天啟四年任衡永郴
兵備道捐俸課士手定甲乙值歲歉鳩形載道士昌
設廠施粥親臨視賑迄秋成乃止全活者萬餘人衡
民至今頌之

徐人龍上虞人進士天啟中督學湖南浹歲周兩試
皆手自評隲集諸生詳為舉示人服其鑑所拔多單
寒士文風為之振起

丘志克諸城人進士先為河南副使督兵援渝州稱

文武才擢大參分巡湖南風紀肅然每集守令勗之
曰承平久矣有志者當思報國諸君優游飭文治竊
為不取也尋陞布政使

盧象昇字達斗宜興人天啟二年進士懷宗七年以
右僉都御史撫郿時兵缺餉且思從賊象昇鎔所服
銀盛鞵帶市具椎牛犒衆因戒約人咸感勵誓死不
二值蜀寇反楚者駐郿之黃龍灘與總督陳奇瑜分
道夾擊斬馘五千六百餘漢南寇幾盡因請益郿兵

減賦稅繕城郭貸鄰穀募商採銅鑄錢郎得完葺

明

史稿

王驥江南人懷宗時任分守湖北道撫苗督餉著有

成績

舊通志

黃公輔廣東人懷宗時以御史任分巡湖北參議廉
介自守政簡刑清歷任數載終始如一

陳瑾字自岳南寧人懷宗時任分巡湖北參議剛方
明達洞悉民隱凡有興革必諮詢父老除奸蠹培士

氣修城垣任滿百姓遮留之

水佳應字向若寧波進士懷宗時任湖廣學道端方清慎憐才樂善取士文行具備至今傳為典型

高世泰字彙旃無錫人懷宗時由進士任湖廣提學究心經史崇尚理學士習文風為之一張凡先賢宜崇祀者舉之已載祀典為文祭之博徵名儒讀書濂溪書院以名節相砥礪後多致顯官所著有三楚文獻錄

以上舊通志

袁繼咸字季通宜春人天啟中進士懷宗十年為湖廣參議分守武昌戢強宗呂瘦子之亂巡撫余應桂奏兼僉事分巡武昌黃州賊老回回等七大部犯黃陂黃安咸馳救賊遂引退與黃岡令徐調元築城六千餘丈一日而竣十三年擢右僉都御史撫治鄖陽未一年襄陽陷被逮宗室士民訟其善政乞以身代罪畱撫殘疆竟不許

明史稿

張秉貞字坤安桐城人由進士為下江防兵備道駐

蘄州時流寇充斥往來擄掠親至谿口督剿賊遂遁
去由平時先事設防故寇不敢窺伺近郊民賴安堵

舊通志

許文岐

孫傳庭

張克儉

王永祚

宋一鶴

崔文榮

朱士鼎

王喬棟

以上詳忠臣志



湖廣通志卷四十一